

東
華
續
錄

東華續錄

咸豐八十五

臣王先謙敬編

臣陶濬宣恭校

咸豐九年己未春正月癸酉諭內閣朕自御極之初特開恩榜迄今已閱數年緬維 皇考宣宗成皇帝五旬六旬萬壽均降 旨特開鄉會試 恩科仰見 宏敷教澤行慶作人有加無已茲於咸豐十年屆朕三旬萬壽允宜特開慶榜嘉惠士林著於本年八月舉行恩科鄉試明年三月舉行恩科會試以副朕簡拔人材至意○乙亥勝保奏查淮北捻匪東至濟甯西至潁州一帶任意竄突推原其故總由督辦不得其人勦辦不得其法也夫捻匪之顧戀老巢聽命賊首乃其素習 臣自勦匪以來惟以擣穴擒渠爲主卽英桂與 臣會辦時 臣率師而南專辦大股擒首而畱袁甲三攻

其老巢牽制餘匪亦係力主此法總未容其深入東豫境內也臣

上年由毫而潁自柳溝集潁上縣方家集三河尖正陽霍邱一路

轉戰而至六安節節掃除借彼時皖省無會剿之兵僅恃臣軍一

面追剿以致六安有回竄之匪比賊至懷鳳臨淮亦係地方官不

設守禦致該匪得以占踞臣偏近賊巢擇要紮營扼賊之吭使之

不得休息羣捻專顧老巢遂無力肆擾其時袁甲三若能與臣相

爲犄角更當早有頭緒迨本年八九月間臣南剿後督辦之責在

袁甲三臣窺其辦法賊巢在蒙亳而彼不往攻賊首在懷遠而彼

不痛剿徒藉口於徐宿爲北路重地矢志不移然要路實不止一

徐宿也若謂守徐宿即可杜賊北犯何以任賊直入豫疆疊擾東

境皆由徐宿附近繞越突過足見北犯要隘並非專在徐宿卽扼

紮徐宿亦無須牽掣如許重兵袁甲三自謂扼駐徐宿爲顧全大

局臣則謂其株守徐宿實貽誤大局此時臣營有會剿之兵而北軍無合力之舉似此日甚一日焉有了期大抵袁甲三老成持重則有餘調度機宜則未善臣目擊情形亟思親往督剿無如定遠一城爲南北關鍵設抽身遠離則粵匪耽耽環伺翁同書一軍未免獨力難支惟袁甲三若仍照此辦法必致粵捻南北勾結餉道東西隔絕不能兩全必致兩損臣受恩深重不敢緘默不言惟有據實籲請 皇上另派知兵重臣督辦剿匪事宜抑或仍飭袁甲三節節進紮實力攻剿庶幾於全局有裨 上諭內閣太僕寺卿袁甲三奉命督辦三省剿匪事宜已逾半載但知防堵徐宿不能直擣賊巢日久遷延迄無成效著卽來京供職伊子編修袁保恆著一併回京所有三省剿匪事宜著派提督銜江南徐州鎮總兵傅振邦督辦並著革職畱營之正紅旗蒙古副都統伊興額幫同

辦理袁甲三所帶兵勇均歸傅振邦等統帶○諭軍機大臣等勝保翁同書奏請飭將部撥要款迅速撥解等語皖省自潁州告警逆捻紛擾勝保等軍餉道均已梗塞山陝河南各省餉銀無從解運著何桂清於江蘇藩庫內無論何款迅卽撥銀四五萬兩解赴勝保等軍營又前經戶部於淮北鹽課協貼項下奏准每月撥解銀二萬兩復經勝保與袁甲三商定每處撥銀一萬兩迄今三月之久未據解到見在該營各項要需均無所出並著何桂清會同庚長卽將前項銀兩如數迅速籌撥派員解往以濟急需毋得往返函商致稽時日並不得以應解皖省他款作抵致涉牽混將此由五百里各諭令知之○諭翁同書奏各省協餉不到請旨飭催一摺皖省軍營餉需前據翁同書請於山東山西陝西每月各撥銀二萬兩河南月撥銀六萬兩並以捻氛日熾餉道不通業經該

撫知照山西陝西兩省此後解餉務由泰安沂州一帶行走河南
省亦由東路繞越以免耽延惟各該省總未源源解到而皖營待
餉情形實屬萬分急切自應速籌接濟著崇恩英桂曾望顏各將
月撥銀二萬兩恆福將月撥銀六萬兩按月如數籌解除山東本
由泰安沂州行走取道清江盱眙豫省亦卽由東路繞道以期迅
速毋得稍存玩視致滋貽誤又另片奏浙省應解皖餉五萬兩久
未解到請飭速解等語部撥浙江省皖餉五萬兩前據胡興仁奏
請將河南應解浙江軍餉銀五萬兩就近抵解安徽此項劃解銀
兩並著恆福一併撥解以應急需將此由五百里各諭令知之○
丁丑以捐輸軍餉永廣江蘇長洲元和吳縣學額各三名○戊寅
四川總督王慶雲奏遵覆雲南巡撫張亮基抵省以後情形並籌
商大局得旨覽奏稍慰朕懷想該督接奉諭旨必有確實奏報○

乙卯諭軍機大臣等鄭魁士奏甯防布置情形並軍械餉糈短絀請飭浙省速行撥解一摺甯國軍營餉需疊據胡興仁奏報撥解惟該營欠餉過多且自潰挫以後器械鍋帳大半遺失見雖經鄭魁士收集潰散與新到各軍分別布置而徒手未能禦侮枵腹尤難荷戈情形萬分危迫該郡爲浙省門戶設有疏虞關係非淺前經疊諭胡興仁於月撥餉銀六萬兩外仍添籌二三萬兩與鄧瀛自籌之三萬兩湊足每月十二萬之數著胡興仁遵照前旨將應撥餉需按月如數撥解不得以籌措艱難稍涉遲誤至所需軍火等件並著該撫源源接濟與所撥餉銀分別迅速解往至胡興仁前奏派員赴蘇借餉據何桂清等覆稱所有由金陵調援甯國各軍及水陸防勦兵勇十一十二兩月分應發之餉統由江南糧臺借給其正月以後餉需仍由浙江支應惟甯防需餉迫切仍著何

桂清不分畛域悉心籌畫極力兼顧以保東南大局將此由五百里各諭令知之○以賈臻爲河南按察使

由浙江甯紹台道遷

○庚辰諭軍

機大臣等見在天津辦理海防業已布置妥帖僧格林沁於月內總可到津所有地方彈壓事宜必須該督前往督率呼應較靈著慶祺卽赴天津調度一切何日啟程先行具奏將此諭令知之○勝保翁同書奏

臣

因張蔭李允任漸韓秀峯俱有向化之機密令遊擊黃得魁守備李德英及候選縣丞蔡添祿入城多方開導並

將賊中謀主田繡虎等設法牢籠許以頂翎動其歆羨該捻首等

公議皆願受

臣

招撫

臣

因乘勢利導先頒大營旗幟一千面由前

在行營謁見之頭目趙敏祺史芳等祇領回城向來捻眾以領旗

爲歸附渠等見

臣

待以誠信無不歡呼據內探委員密稟張蔭等

日來招集各捻目告以願投誠者隨同在城不願投誠者自去該

城五六萬眾異口同聲別無異議刻已將領去旗幟徧插城上並稟明擬卽擇日出謁薙髮獻城揆其情事似不至有反覆臣復諭任漈將劉狗劉添詳等及西北藍旗各圩一齊勸諭歸順渠已欣然領命前往分投招致約定新正回稟此事果能辦成保全無數生靈節省鉅萬帑餉不獨淮南數城不攻自復實於軍務全局裨益良多惟受降如受敵鳳臨一日不復防剿一日不能疏懈見在北捻白旗匪首孫葵心知李世忠投誠受職又聞臣招撫張濬等遂亦有乞降之意遣人遞稟情願率眾來歸臣竊以孫葵心亦捻中渠魁人多性悍果能悔罪投誠收爲我用則蒙亳一帶捻眾巢穴當易肅清業經設法羈縻妥爲籌辦臣惟有隨機應變當剿則剿可撫則撫以期有成上諭勝保等奏請籌撥招撫經費一摺並片陳近辦情形因各省餉需支絀勢難應手已於摺內詳悉批

示矣各捻股數眾多如果渠魁就撫散其脅從實於大局有裨惟受降如受敵此輩狼子野心最易反覆投誠後是否不至復叛必確有把握方無後患儻因乏食投降目前數萬金尙不難於籌畫以後何以爲繼況皖營兵餉久缺而以重貲賞賊更恐失軍士之心此皆不可不慮非必吝此二三十萬金也若能以賊攻賊則事半功倍得賊輜重即可養投降之眾故必責令立功方能信其悔罪未可輕易受降貪多自喜後受其累也見在張元澹等已願換我軍旗幟擇日薙髮出降自當加以獎賞固結其心所部多人應擇其精悍者分編營伍責令立功攻打何處捻匪其餘脅從之眾分別遣令回籍歸農勿使聚而生變彼既回心向化獻出城池卽當官爲駐守翁同書身任皖撫地方是其專責俟張元澹等獻城卽著選擇文武幹員入城辦事安撫良民不得仍聽搶掠至孫葵

心亦係悍賊如果乞降則蒙亳一帶易於肅清惟須張元澄一股解散安插妥協方可再辦一股若此股尙不足恃卽招彼股恐人心叵測不獨賞需難繼更恐勝保駕馭不易必須步步腳踏實地以免他虞袁甲三已令回京所有剿匪事宜另派傅振邦接辦而以伊興額副之傅振邦等俱素稱勇敢勝保不患無助當與聯絡聲勢南北夾攻直搗巢穴方合剿撫兼施之法毋徒一意主撫爲賊所輕也再前據許乃普奏駐紮靈璧縣之遊擊滕家勝所帶兵勇不過三百餘名能聯絡鄉團擊退捻匪數萬等語如實得力卽著勝保翁同書確查具奏將此由六百里諭令知之○勝保奏籌辦招撫事宜請豫籌經費二三十萬兩解皖備用得旨所見甚是所慮甚大然此時各省軍營同一缺餉焉能湊集鉅款若是之速儻使招而復叛是軍餉之外徒增一項無益之費支絀之際尙堪

如是拋擲耶莫若以賊攻賊事半功倍更可堅其向化之誠督以不能復叛之心天下大局將定之時遣散安置不復靳此小費以期底定所請之處實難應手暫毋庸議若各省應解正餉近已有旨催解再有延宕之處何難指名參奏朕縷晰指示諒勝保必能仰體朕之苦心也○壬午諭內閣贈大學士太傅禮部尚書銜原任禮部侍郎杜壩靈樞回籍前經降旨派貝子綿勳前往祖奠目送並著沿途地方官妥爲照料護送茲聞於本月二十一日啟程著加恩於到籍後賜祭一壇並於贈太師大學士杜受田墓前賜祭均著山東巡撫崇恩派委道府大員前往奠醑以示朕篤念師儒有加無已至意○癸未諭軍機大臣等蔣蔚遠奏黔軍欠餉過多請飭催各省迅解一摺四川山東山西陝西湖南等省欠解黔餉共計四十二萬四千餘兩內惟四川除扣還外解過二萬兩陝

西起解在途銀一萬五千兩此外並無協餉解到亦無起解消息
見在黔省勦匪正在喫緊各路營盤月需餉銀十萬有奇欠發過
多軍心易變自應速籌接濟著王慶雲崇恩英桂曾望顏迅飭各
該藩司各將欠解黔餉銀兩趕緊籌撥派員解赴黔省以濟急需
至湖南省於按月發給韓超軍銀四千兩外其黎平思州二府清
溪玉屏二縣邛水縣丞及鎮遠鎮標官兵餉需能否於湖南欠解
黔餉內就近酌撥接濟之處著駱秉章酌量辦理將此由五百里
各諭令知之○甲申諭軍機大臣等前因廣東省偽造廷寄諭旨
致英國疑慮業經諭令黃宗漢查拏偽造之人本日據羅惇衍等
奏該國懷疑再擾北路旋即退出並鈔錄奸民偽造諭旨與桂良
等前奏相符羅惇衍等在粵辦理團練曾申諭北路鄉民不與英
佛等國爲難致開數端詎該國於上年十二月初一日率眾千餘

由三元里前進一路焚燒轟斃行人鄉民始鳴鑼對仗初五日復直趨石井互有殺傷皆由奸民偽造諭旨致該國疑慮並非羅惇衍等不遵前旨仍與該國構釁本日已諭令黃宗漢柏貴照會該國令其盡釋前疑不可爲奸民所惑額爾金見已回粵儻經查明自必恍然知花縣之事由於奸民偽造諭旨致懷疑慮並非中國故違和約也桂良等接奉此旨卽設法照會額爾金告以此次與鄉民互鬪雖由彼先啟兵端究係因懷疑所致一經說明自當相安無事如額爾金業已回滬更可明白開導以全議撫大局羅惇衍等摺著鈔給閱看○諭前因袁甲三奏餉需不繼請飭在山東登萊青三府屬海口舉辦抽釐當諭令崇恩飭屬查覈妥議具奏尙未據該撫奏到本日據慶祺奏津郡辦理釐捐接濟經費而近來商船多繞赴登州府屬之煙臺海口出入藉圖趨避該處向未

設有稅局以致有礙釐捐且恐各處關稅諸多偷漏著崇恩卽行遴委妥員查明煙臺海口情形議立章程照例覈實徵稅暫行撥解天津協濟海防經費俟海疆平靖仍歸山東報撥至袁甲三所請於各海口抽釐接濟徐州軍餉之處仍著該撫妥籌辦理將此由四百里諭令知之○乙酉諭軍機大臣等本日據袁甲三奏懷遠逆賊糾合萬餘人由臨淮北竄直撲鳳陽靈壁交界之新橋連城一帶逼近滄河經遊擊滕家勝督率勇練在滄河北岸堵守等語該逆糾眾萬餘竄逼滄河意在搶渡並據探報欲由臨泗竄往清江及往桃源竄遷分轄之洋河集一帶搶掠該逆勢甚鴟張東路正形喫緊見由袁甲三先派馬隊六百名馳往援剿尙恐賊眾兵單亟宜豫籌防堵著邵燦庚長卽撥清江見有兵勇並嚴飭桃源竄遷各縣調集兵練密爲布置以杜逆匪紛竄將此由六百里

各諭令知之○諭袁甲三奏滄北連獲全勝見擬移營進紮一摺
逆捻環築十四圩深溝高壘據以爲營意圖圍困苗練卽以開通
竄路我軍旬日以來連戰皆捷並毀賊圩兩座兵練聲息已通卽
當乘勝進逼前已有旨調袁甲三來京供職派傅振邦督辦三省
剿匪事宜並派伊興額幫同辦理該總兵見有督剿之責著與該
副都統督率兵勇速解苗沛霖之圍令該練總隨時出擊牽制賊
勢一面分撥馬步隊扼要緊逼斷其接濟爲一鼓成擒之計前諭
東豫兩省合力會剿已據恆福派出總兵邱聯恩等豫爲布置其
崇恩所派富新黃良楷統帶兵勇四千名據袁甲三奏稱定於開
印後出境著俟兩省兵勇到後傅振邦等卽與會合進剿直擣賊
巢毋令匪蹤他竄其新橋連城一帶匪眾是否已渡滄河應就見
有兵力妥籌兼顧本日並諭邵燦庚長嚴密堵剿矣將此由六百

里諭令知之○丁亥 上幸圓明園○諭軍機大臣等胡興仁奏
徽甯需餉孔亟請飭江蘇省暫爲通那一摺據稱江南所派援甯
兵勇業經何桂清由蘇發給十一十二兩月口糧本年正月卽須
由浙支放見在鄭魁士將南陵西路之賊攻退卽可規復灣黃援
師四集需餉萬分緊要浙省勸捐見無起色一時湊辦不及擬請
飭江蘇省於庫存項下暫借銀二十萬兩以救目前之急俟浙餉
稍裕卽行籌還等語前因甯國缺餉浙省未能接濟曾諭何桂清
不分畛域就近籌撥著該督仍遵前旨卽於蘇省庫款內酌量撥
銀二十萬兩以濟甯防之餉毋使飢兵潰散又生意外之變將此
由五百里諭令知之○戊子諭內閣吳振械奏請開復辦團鄉紳
革職處分等語雲南在籍侍郎黃琮御史寶坻前因辦團錯謬降
旨革職交吳振械查訊治罪茲據奏稱查明黃琮等辦理團練持

論未能平允及刊刻告示有乖體制各情雖俱事出有因惟察訪輿論皆竇塤主持其事厥咎較重黃琮止於不能駁正該革員等當省城被圍時均隨同登陴固守又復勸捐出力功過尙足相抵黃琮著准其開復原官竇塤著交部議處其革職治罪之處著加恩寬免○命河南河北總鎮兵官樂善赴欽差大臣勝保軍營隨同勦賊○庚寅諭內閣王懿德奏順昌等處各股首率黨投誠籌辦大概情形一摺福建省上年春間江右逆匪闌入滋擾攻陷府縣城池疊經王懿德等督師勦辦次第削平僅止連城一縣尙爲賊踞該省地瘠民貧其被賊裹脅陷而爲匪者爲數甚多情實可憫王懿德飭署延建邵道潘駿章等協同紳士勦撫兼施據江西股首周烜熾及廣東汀州等處各股首先後赴營薙髮投誠共計夥黨七八千人見已挑選精壯留充新勇允宜寬其既往予以更

新所有率眾向化之股首周恭熙卽周烜熾著加恩以陸路把總候補並賞給軍功五品頂帶邱邦榮等並著以把總外委額外等職拔補分別賞給軍功頂帶俟續有勞績再請恩施遣散夥黨分飭原籍地方官隨時稽察安置仍聽自謀生理前犯罪名概免查究以資激勵○予安徽陣亡從九品郭培先等祭葬世職○癸巳諭軍機大臣等定福奏援案請提稅銀支發兵餉等語山海關海口備防緊要業經定福酌調防海官十一員兵四百名駐紮海口防禦惟該官兵等口糧據稱無款可籌深恐有誤防務著定福傳諭山海關監督誠明將所需口糧卽在收存關稅銀兩內酌量提用以資支放毋誤要需將此諭令知之○追予江西殉難知縣傅培峯建祠○甲午命挑吉林黑龍江兵各一千名綏遠歸化兩城兵各五百名候天津防所調遣○乙未諭軍機大臣等勝保翁同

書奏請飭各路統兵大臣及各省督撫嚴禁偷販私礦等語據稱參將李世忠詳稟逆匪橫行皆由私礦接濟並指出大江南北水陸口岸各要隘奸商通匪偷販各情亟應嚴行查禁以杜私售惟見在用兵地方蔓延數省隘口過多私礦販運之處斷絕非易其各省會及著名鎮市商賈輻輳之所尤應詳加盤詰除山西等處產礦之地嚴禁私礦出售外其各路軍營及用兵省分非有統兵大臣及該督撫委員解送印文知照者概不准擅行採買其經過關津隘卡如無印文護票者卽著查拏懲辦儻有不肖官吏私行賄放者察出嚴行治罪軍營兵勇如有偷漏硝磺火藥接濟賊營者卽以軍法從事著官文德興阿和春勝保曾國藩張芾傅振邦等及各直省督撫嚴定章程實力盤禁毋稍鬆懈至所呈該參將原稟太平關無爲州等處粵逆日收稅銀爲數甚鉅並著和春何

桂清等嚴飭地方員弁於東壩一帶曉諭商民不准在太平關等處販賣貨物使該逆收稅日少無從接濟米糧以冀制賊死命是爲至要將此各諭令知之○諭恆福奏派防亳州官軍擊賊獲勝請飭撥馬隊一摺亳州東南捻股甚多匪蹤飄忽靡定朱連泰所帶僅有壯勇七百餘名內止馬隊四十名爲數本單近來賊匪多有騎馬衝突官軍對壘非馬隊不能得力著傳振邦伊興額於徐州軍營馬隊內酌撥一二百名飭赴亳州交朱連泰調遣以資助剿將此由五百里諭令知之○命樂善改赴天津軍營差委○命挑直隸北路各營兵二千名察哈爾兵一千名密雲熱河兵各五百名候天津防所調遣○丙申頒 硃諭今日閱翰林名單見錢桂森銜下註寫國史館總纂幫辦院事本衙門撰文以上各項是否俱係奏派抑係該員由御史回原衙門後堂派爲將來一等地

步著片傳翰林院由該衙門自行覆奏○諭軍機大臣等昨因王
懿德奏順昌等處各股首率黨投誠降旨將周恭熙等賞給把總
等職及軍功頂帶茲據御史陳濬奏該股首等蹂躪郡邑荼毒生
民請飭撤銷一摺閩省上年江右逆匪闖入滋擾疊陷城池其被
裹從逆之人如果情罪尙有可原固可寬其既往予以自新若投
誠非出於本心恐以後必多反覆著王懿德查明周恭熙等是否
悔罪乞降堪以加恩錄用至上年慶端在延平辦理軍務有無遷
就粉飾等情其所保莊煥文章琮皆該撫幕友俱請以道員交軍
機處記名未免冒濫並此外保舉人員有無徇情濫保之處均著
該督確切查明據實具奏毋許稍有回護尤不許妄洩私憤藉端
而發不敢觸諫垣之怒有意沽名原摺著鈔給閱看將此由五百
里諭令知之○丁酉曾國藩奏據李續宜稟稱李續賓遵旨進攻

廬州因三河鎮爲舒廬衝要賊築僞城一座堅壘九座九月二十八日進紮三河十月初二日親攻九壘下之適粵逆陳玉城捻匪張落刑各率大股來援賊眾十餘萬連營數十里鈔大軍後路李續賓所部除留防九江及舒桐外隨征不過五千餘人又攻壘血戰銳卒損傷過多遂飛調防兵策應未及至而賊已來逼初十日派隊迎擊金牛鎮戰於樊家渡已獲全勝忽左路出賊數萬乘霧來鈔我軍回戈返鬪前後受敵參將彭友勝遊擊胡廷槐饒萬福力戰死之餘皆截阻不能歸營李續賓自領親兵救應而僞城之賊復出與援賊相合我軍四面被圍初更時最後兩營李續燾彭祥瑞越壘衝出於是賊踞其壘斷我軍去路或勸以突圍退保無難再振李續賓誓不生還二鼓向盡怒馬直出赴悍賊林立處死之臣胞弟冒國華及何忠駿何裕王揆一李續藝吳立蓉萬斛源

等皆死之而副將李存漢道員孫守信運同丁銳義等猶督守孤
壘以俟桐城援兵至十三日夜子藥水米俱盡孫守信等死之十
九日賊攻桐城李存漢趙有材謝嗣湘李景均等死之桐城復陷
凡湘軍員弁兵役隨李續賓死者近六千人十一月三河附近紳
民從賊中覓得李續賓忠骸潛送霍山迎至黃州卽將返葬湘鄉
各等情臣查李續賓戰績自咸豐三年赴援江西克復太和安福
永興四五兩年攻克岳州武漢廣信等處六七八等年攻克武漢
九江皖北各處此次死事之烈官文等必詳奏請卹惟臣與李續
賓從事較久相知頗深有不得不瀆陳於 聖主之前者李續賓
初援江西嗣隨羅澤南征勦各處循循若無所知逮岳州大橋之
戰塔齊布獨稱湘勇白旗爲無敵賊亦深畏白旗白旗者李續賓
所部右營也旣而田家鎮之役以少勝眾九江之敗士卒多逃散

獨右營勇丁依依不去然後眾稱其賢能得士心矣猶復粥粥無能轉戰江西岳鄂之間經過州縣不見一客稠人廣坐不發一語自楚軍之興人人皆以節烈相高慷慨陳詞豫相邀約李續賓獨默然深藏初不豫作激烈自許之言然忠果之色見於眉宇閒遠近上下皆有以信其大節之不苟臣所立湘勇營制編隊立哨略倣古法計事授精皆有定程行之既久各營時有變更惟李續賓守法五年始終不變嘗謂臣曰立法者但求大段妥善行法者當於小處彌縫臣初定湘營餉項稍示優裕原冀月有贏餘以養將領之廉而作軍士之氣李續賓統營既多歷年已久節省贏餘及廉俸至數萬金不寄家以自肥概留備軍中非常之需咸豐六年冬曾寄銀五千兩於南昌濟臣糧臺之急七年冬又寄銀萬兩至吉安濟臣弟國荃一軍又寄三千兩至貴溪濟李元度一軍此外

贏餘銀兩亦皆量力濟人不忍他軍飢而已軍獨飽往者故撫臣

江忠源嘗論兵勇利病勇則畛域不分而患其蹤迹無定此之所
革彼之所收兵則名籍有定而患其界限太分勝不相讓敗不相
救兵則規矩較肅而患無陷陣剛猛之風勇則銳氣較新而患無
上下等威之辨故用兵以和爲貴用勇以嚴爲貴李續賓馭下極
寬終年不見慍色而弁勇有罪往往揮涕而手刃之甲寅十月在
田家鎮斬退怯之勇臣奏牘稱其有名將之風故刑人無多而歲
久無敢弛慢至於臨陣之際專以救敗爲務以顧全大局爲先遇
賊則讓人禦其弱者而自當其悍者分兵則以强者予人而攜弱
者以自隨或攜隨數次弱者漸強矣則又另帶新營以自隨江楚
諸軍每言肯攜帶弱兵肯臨陣救人者前惟塔齊布後惟李續賓
此次三河之敗未始不由乎此此軍民所尤感泣不忘者也臣昔

觀李續賓厚重少文百戰無挫私心慰幸以爲可躋中興福將之列不意大難未平長城遽隕督臣官文等具奏請卹諒蒙聖慈矜鑒臣與李續賓同縣姻戚不敢飾辭溢美亦不敢沒其忠勳謹就夙昔所知瀆陳宸聽伏乞飭付史館採入列傳上諭內閣巡撫銜浙江布政使李續賓前在三河鎮勦賊陣亡業經降旨優加褒卹茲據曾國藩臚陳該員功績具奏覽之益深悼惜李續賓從軍數載所向成功及其見危授命麾下將士無一偷生實有古名將之風允宜垂諸信史百世流芳著將曾國藩此奏交國史館採入列傳以示褒嘉○曾國藩奏接各路函稟三河營壘於十月初十日被圍是夜李續賓怒馬赴敵死之臣弟曾國華義不獨生亦衝騎赴賊中死之幕中諸友如何忠駿等同時並殉惟孫守信復堅守兩日至十三夜乃從容就義等情溯查咸豐五年十月逆

賊石達開率眾竄入江西句結廣東匪徒周培春等連陷瑞臨袁
州三府六年春又陷吉安撫建三府臣所部諸軍羅澤南既先赴
湖北周鳳山又敗於樟樹鎮臣不得已率水師赴援省城而令李
元度陸軍進攻撫州維時人心震驚道路梗阻臣幾有岌岌坐困
之勢臣弟曾國華馳赴武昌乞師以救江西經胡林翼奏委國華
統領普承堯吳坤修劉騰鴻各軍赴援遂由咸甯蒲圻沿途迎勦
取道萬載攻克新昌上高兩月之間連復六縣遂圍瑞州由是江
西湖南始通音問而國華積勞致疾就醫南昌與臣握手相見悲
喜交集蓋以新募之眾千里來援節節攻勦摧江西十餘萬之賊
鏖戰於酷暑烈日之中艱險備嘗乃有此兄弟會晤之一日也病
痊仍回瑞州督勦七年正月臣赴瑞州與國華定計合圍掘長濠
三十里斷賊接濟二月丁父憂兄弟奔喪回籍厥後瑞城克復尙

未變國華原定規模臣叔父曾驥雲無子以國華爲嗣八年二月
降服期滿四月李續賓調赴湖北奏明畱營幫辦相與講求戎政
晨夕商酌國華性好讀史頗懷大志於古人艱危之境反復推究
其得失平昔持論過高臣恆誠之近日議論軍事漸歸於精細穩
實與李續賓兄弟意見多合十月初九日猶以家書寄臣稱援賊
麇至各營意欲退保國華與主帥堅持不退二人謀合必不爲眾
說所搖等語豈料其發信之次日卽爲效命之秋而其堅持不搖
之計卽爲全軍俱殉之機也七年五月間欽奉恩諭有曾國華帶
勇援應一門忠義實深嘉尙之褒跪讀之下感激涕零今幸臨危
不苟仰副 聖慈捐糜以報生成之德在門戶亦足增榮子弟得
附忠義之林在臣心更復何憾特以臣叔父年齒日高倚閭望切
孤姪曾紀壽幼穉何依臣六載軍中愆尤叢集卽手足私愛亦覺

愧負良多建昌去舒城千有餘里兵力不能遽及山川間隔日月

寢淹骸骨未收遺憾難雪追思昔年若無國華援應臣無以至今

日臣軍無以圖倖全卽江西亦無以轉危爲安憫念微勞不忍不

瀆陳於聖主之前至於例得卹典應由湖北督撫彙案具奏臣

不敢妄爲乞恩上諭候選同知曾國華在三河鎮殉難當經降

旨追贈道員從優議卹該故員歷著戰功一門忠義著再加恩賞

給伊父曾驥雲從二品封典以示褒嘉○曾國藩奏臣接奉諭旨

飭令通籌全局臣才識短淺何足以言規畫就近處數省而論則

安徽軍務最爲喫重江西次之福建又次之皖南中界一山皖北

中隔一湖兩路賊勢臣前疏已詳晰具奏近聞福建之賊尙踞連

城江西之賊竄入南安贛州戒嚴定南崇義相繼失守以臣愚見

連城之賊閩省兵力應足了之南贛之賊人數尙多悍者較少非

一支客軍所能猝辦必須本省兵力輔以團練方可徐起有功惟安徽賊黨其氛甚惡其患方長大凡官軍與賊彼此互爲消長斷無中立之理我能進而勦賊則賊將竭力禦我不暇他竄我不能進而勦賊則賊將乘隙犯我旁出四溢皖南無進勦之師則賊必東犯浙江皖北無進勦之師則賊必北犯齊豫故就一隅觀之則江西之南贛福建之連城均是賊黨均須兵力不可舍近而圖遠就全局觀之則兩利相形取其重兩害相形取其輕又不得不舍小而圖大誠使大江兩岸各置重兵水陸三路鼓行東下勦皖南則可分金陵之賊勢即可紓浙江之隱憂勦皖北則可分廬州之賊勢即可紓山東河南之隱憂方今湖北全省肅清然與皖境處處緊接防不勝防者莫如湖北據上游之勢能制皖賊之死命者亦莫如湖北臣與官文胡林翼等熟商就見在之兵力稍加恢廓

北岸須添足馬步三萬人都興阿李續宜鮑超等任之中流見有水師萬餘人楊載福彭玉麟任之南岸須添足馬步二萬人臣率蕭啟江張運蘭等任之三道並進夾江而下幸而得手進占十里則賊蹙十里之勢進占百里則賊少百里之糧卽不甚得手而上游之勢旣重卽下游之賊不得不以全力禦我其於金陵廬州兩大營均有裨益此遵旨通籌全局宜併力大江兩岸之微意也至臣處近日軍情蕭啟江一軍自拔營南赴雩都據稟南贛各屬賊蹤蔓延力難兼顧臣飭令專救贛州以保要郡不必旁顧他處張運蘭一軍自十二月十七日馳抵景德鎮十九日吳國佑小挫一次二十七日張運蘭大勝一次贛州居江西之極南景德鎮居江西之極北相距千餘里臣駐建昌距兩軍各五百里調度不靈轉運不便且兩處皆孤軍深入賊眾兵單日夜焦思無師可濟臣前

摺聲明蕭啟江之軍或畱防南路或隨臣北行容俟續行具奏近

日詳加體察顧此則失彼顧南則失北與其懸心兩地不若專力

一方已咨商江西撫臣耆齡請其另調勁軍以勦南贛兼辦團練

以散脅從臣即專辦北路調回蕭啟江一軍歸併饒州彭湖等處

在江西則臣管北邊耆齡管南邊在皖楚則臣攻南岸都興阿等

攻北岸地有分防斯責無旁貸師有定向斯士無二心免致到處

牽掣一無所成此臣處近日軍情擬調蕭啟江併赴北路之微意

也臣往歲在軍未聞賊匪能用馬隊近聞粵匪嘗以馬隊衝鋒捻

匪則邊馬尤多李續賓三河之敗即係賊馬數千爲湘軍向來所

未見昨吳國佑景德鎮之挫亦爲賊馬所困今欲整頓陸軍不得

不添設馬隊東三省馬隊爲天下勁旅根本所在不敢多爲奏調

臣與湖北督撫函商擬由官文等奏調察哈爾馬三千匹請旨飭

上駟院押解來南潁毫一帶有善騎之勇可募名曰馬勇應卽添練新馬隊二千餘騎與都興阿之舊隊相輔而行於九江湖口等處擇平原曠野馳騁而操習之惟以南人而騎北馬以勇丁而學弓箭非倉卒所能奏效臣願竭數月之力朝夕講求從容訓練期於成熟而止練成之後以二千匹分江北隸都興阿舒保等麾下以五百匹分江南隸臣麾下以壯步軍之氣而寒賊黨之膽餘賸馬匹游牧於黃州鞍轡等具設局於九江以備隨時添補更換之用仰仗 皇上威福茲事若成皖豫等省軍務可期大有起色此添置馬隊臣願自任教練之微意也溯自咸豐六年洪楊內亂河北肅清武漢再克臣方慶幸以爲大難計日可平不謂遷延歲月粵匪未靖捻匪復滋餉項有日竭不支之勢將士有久疲思退之心不得不改絃更張亟思所以振之也 上諭軍機大臣等曾國

藩奏遵籌全局請添馬隊進取一摺所稱安徽賊氛甚惡湖北據皖境上游北岸須添足馬步三萬人都興阿李續宜鮑超任之見在水師萬餘楊載福彭玉麟任之南岸須添足馬步二萬人由該侍郎率張運蘭蕭啟江等任之又稱駐紮建昌距贛州景德鎮兩軍較遠調度不靈擬調蕭啟江一軍併赴北路等語該侍郎統籌全局意在併力大江兩岸爲節節進剿之計所見甚是惟見在江西南贛等處賊氛尙熾該侍郎未能卽日北行俟南路稍鬆再赴皖楚交界籌辦大局其調察哈爾馬匹一節上年調赴袁甲三等軍營之馬沿途倒斃十之七八一路解費概屬虛糜翁同書因廬營缺馬曾有就地採買之請較之遠路調撥似有實濟本日已諭知官文等設法籌辦矣另片奏請飭健銳等營選派精練弓馬之三四品官赴營等語已諭都興阿先於該營內酌量選派或京營

及東三省中有素所深悉之人並著指名奏調以資教練將來楚軍東下如馬隊不敷並可由勝保等軍營酌量協撥編修郭嵩燾見隨僧格林沁前赴天津俟該處撤防再降諭旨主事李榕已令赴營差委至江西建昌甯都見無防兵亦已諭令王懿德卽飭饒廷選酌帶所部兵勇馳赴江西聽候曾國藩調度矣將此由六百里諭令知之○諭曾國藩奏通籌全局須添練馬隊一摺據稱見在賊勢以安徽爲最重能據其上游而制其死命莫如湖北曾與官文等籌商北岸添馬步三萬人以都興阿等領其軍中流水師楊載福等任之南岸亦須添馬步二萬人該侍郎自率蕭啟江張運蘭等前往統領爲三道並進夾江東下之舉惟蕭啟江赴援贛州張運蘭專剿景德鎮兩軍皆距曾國藩軍營甚遠擬商耆齡另調勁軍以剿南贛該侍郎卽專辦北路調回蕭啟江歸併饒州彭

湖等處商由官文等奏調察哈爾馬三千匹以備募練馬勇所議軍情均合時勢惟江西見無兵力可與蕭啟江抽換曾國藩仍須暫畱建昌防剿南路俟賊勢稍鬆再赴江西北境察哈爾馬匹本屬無多節次調往勝保袁甲三軍營沿途倒斃十之七八徒滋糜費是以上年翁同書有籌銀購馬之請不如仍由湖北採買較爲便捷近年粵捻各匪多用馬賊衝鋒官軍自應添備驍兵與步兵相輔前此湖北練習馬隊已有成效自可擴充辦理將來楚軍東下如馬隊不敷並可由勝保等軍營酌量協撥該侍郎又以南人使馬不甚精熟請由健銳營火器營選派精練弓馬曾經戰陣之三四品官五六員赴營教練等語著都興阿卽於該營將弁中選擇技藝精熟者以資教練如京營東三省中有都興阿素所知悉之人卽著指名奏調將此由六百里各諭令知之○曾國藩奏

臣

前咨商者齡撥兵來建昌換防頃准覆函以贛南方棘無兵可撥
屬_臣暫駐建昌兼防閩賊內竄等語查南路防剿喫緊而連城一
股經閩兵阻截難保不回竄江西且_臣拔營北行去蕭啟江一軍
愈遠聲息難通目下有不能遽行移營之勢自應暫畱建昌相機
辦理再查建昌甯都各屬別無防兵江閩交界千里空虛贛南鎮
總兵饒廷選帶兵在閩前因患病未痊經督_臣王懿德另派豫祺
接統連城諸軍入春以來饒廷選病體當已漸愈該總兵係江省
地方官曾奉旨歸_臣調度前守廣信衢州著有成效仰懇 天恩
飭令饒廷選酌帶所部前來江西或駐紮甯都建昌或卽赴贛州
本任應俟臨時酌奪如蒙飭調則南路邊陲有備兼可爲閩境聲
援 上諭江西南路防剿喫緊該侍郎暫駐建昌咨商者齡贛南
一帶無兵可撥贛南鎮總兵饒廷選見在革職畱營在閩患病並

未帶兵出勦閩省州縣惟連城未復不難剋日殲平該總兵患病
諒已就痊著王懿德卽飭酌帶所部兵勇馳赴江西曾國藩軍營
聽候調度毋稍遲延將此由五百里諭令知之○諭勝保翁同書
奏逆匪接濟金陵糧米並於烏江開挖新河請飭德興阿等派兵
堵截等語據稱總兵吉順函稟有民人自店埠逃出供稱粵逆因
大江阻塞令民間挑運米糧由旱路梁山至江浦之九洲洲送入
金陵數月來絡繹不絕見令偽旅帥出夫於烏江開挖新河直抵
江浦以便往來等情逆匪久踞金陵未能攻克總因賊糧未斷見
在勝保駐紮鳳陽距烏江江浦等處較遠著德興阿等就近派兵
於九洲洲地方嚴行堵截斷賊糧道毋令接濟金陵並撥兵於烏
江一帶實力堵禦毋令逆匪開挖新河橫行無忌如江北兵力一
時未能兼顧卽著咨商和春酌派勁兵前往分途堵截毋稍遲延

將此由六百里諭令知之○諭勝保等奏河南南陽鎮總兵邱聯恩見在統帶豫省防兵駐紮鹿邑惟守近不如守遠該處淝河口地方爲太和鹿邑交界實爲豫省屏蔽若將邱聯恩一軍移駐淝河則北可聯絡亳軍南可控制潁郡於會剿機宜當有裨益等語所奏不爲無見著恆福體察情形若令該總兵移駐淝河以扼捻巢要隘於豫省邊防是否仍無阻礙卽著酌量辦理將此由五百里諭令知之○勝保等奏請飭已革江甯布政使楊能格來營接辦糧臺得旨一切兵機斷不能俟奉命而行至於可緩之事亦從無敢擅行者勝保擅行札調已革大員殊屬膽大所調楊能格之處著不准行勝保著交部議處翁同書著交部察議並著兵部將此奏片硃批行知各路統兵大臣等知之○戊戌諭內閣翰林院奏遵旨覆奏一摺翰林院編修錢桂森上年甫經由御史獲咎回

原衙門行走翁心存派充國史館總纂等差使未免過優錢桂森著撤去總纂改爲纂修翁心存著交部察議○諭刑部奏覈議捐輸贖罪章程請照常赦條款變通辦理開單呈覽一摺朕披閱准贖各條尙多輕縱業經親加刪定嗣後官常各犯除枷杖情節本輕准予捐贖外其遣軍流徒各犯不在常赦不原之列者於捐贖時仍隨案覈定以持情法之平該部卽將此次原奏硃筆刪改各條行知火器營遵照辦理○諭軍機大臣等桂良等奏黃仲畚李泰國先後報到額酋於上年臘月到粵果否回滬尙在未定伊弟普魯斯遲三四十日可到廣東擬至上海一轉卽往天津定欲進京互換和約等語覽奏實深詫異各夷和約本議定在上海互換是以授何桂清爲欽差大臣原冀桂良等卽在上海妥爲辦理乃遲之又久於進京等事尙未挽回而英酋額爾金駛回香港另換

伊弟普魯斯到滬並欲直至天津是該夷意存叵測已可概見儻該酋仍到上海桂良等務須極力開導告以大皇帝派我來此辦理稅則並令廣東將欽差大臣關防移交何桂清所有和約並另立專條必須卽在上海由我等一手辦理若到天津該處並無經手之人無從辦理且自上年各國船隻退出後天津紳民業已團練整齊不使輪船駛近攔江沙儻到津船隻或受損傷我等不能任咎又或復開兵釁則上年條約必致全歸罷議於各國通商事務大有妨礙如此剴切曉諭總使在滬換約方爲妥協況消弭四事另立專條尙無成說豈桂良等毫不動心竟欲在津換約置身事外耶茲另發去諭旨一道著卽宣示該夷俾知天津已有準備不至遽行北駛該大臣等仍應設法挽回四事另立專條再行奏請互換萬不准含糊了事自干罪戾○己亥 上還宮○庚子予

安徽陣亡訓導年順行等祭葬世職○免奉天官兵應繳赴防整裝銀○辛丑諭軍機大臣等都興阿奏患病未能速痊懇請續假離營調理已降旨賞假兩箇月矣該將軍見辦剿匪事務正當喫緊據奏有記名副都統多隆阿爲前敵布置尙無貽誤已將所帶兵勇悉交統帶惟軍務重大總須調度有人胡林翼近在黃州卽著將進止機宜妥爲籌畫責成多隆阿督率將士各加奮勇不至因主將遠離遷延觀望並著官文與該撫會商妥辦務臻周密是爲至要將此由五百里各諭令知之○諭傳振邦奏軍餉久缺請飭江蘇山東河南山西各省將應解餉銀趕緊籌撥等語據稱宿州軍營上年山西山東兩淮欠解銀十九萬兩淮海亦欠解月餉七千兩疊經袁甲三催解僅據山西解到銀一萬二千兩兩淮解到銀三千兩其餘並河南省應解之款均未解到見在該處賊氛

甚熾亟須會集官兵約期夾擊而兵勇僅食山芋麤糧尙未一飽
恐決裂之患卽在瞬息之間著崇恩恆福英桂將各該省欠餉趕
緊補解並將每月應解餉銀按期籌撥至山東河南三省毗連徐
宿儻因餉缺兵飢賊匪必致北竄崇恩恆福尤應不分畛域速籌
接濟毋得稍存膜視前據袁甲三奏捻匪有正月出巢之語亟應
三省會剿並著崇恩恆福與傅振邦會商應如何進剿之處迅速
辦理其兩淮淮海所欠宿州軍餉並著何桂清徐有壬飭屬趕解
將此由五百里各諭令知之○命挑內外火器營八旗兩翼官兵
一千名健銳巡捕兩營官兵各五百名備天津防所調用○是月
緩徵山東臨清四十六州縣並德州等五衛江西南昌等七縣福
建邵武等四府二十五縣並邵武等三廳被水被旱額賦展緩浙
江海鹽歉收白糧賑安徽滁州等二州縣山東東平等八州縣並

東昌衛被擾被水貧民一月口糧免貴州都勻等二十一府廳州縣並錦屏縣丞所屬被擾地方額賦

二月壬寅朔諭軍機大臣等此次各國議定稅則內洋藥一項從前未經定稅之時聞地方官多有影射抽收侵吞入已情弊見在既經議有定章官爲收稅自應一律辦理上海爲各商薈萃之所尤應及早奉行見經戶部由驛通行諒江蘇省當已奉到曉諭商民一體遵辦特恐地方官希圖掩飾壓閣部文不能及早奉行或以多報少藉肥私橐皆所不免著桂良花沙納嚴密訪查儻有前項弊端卽行會同該督撫據實參奏毋稍徇隱且使夷商知此次稅則業經通行獲利已多桂良等亦可藉此爲詞消弭兵釁將此由五百里密諭知之○兵部奏貴州陣亡官弁議卹一摺得旨議卹事件有何迫不及待之處爾等豈不知今日祀神吉期遞此無

關緊急之事兵部堂官著交部察議又奏遵議庫倫辦事大臣德勒克多爾濟等處分未會理藩院批此摺因何不會理藩院試問該貝子所兼職任向歸爾部考察否與在京蒙古所兼職任一例否其中難保無聽人屬託礙於情面不得不允著逐層明白回奏○直隸總督慶祺奏到天津日期並調永定河道崇厚赴津得旨崇厚人非出色不解汝喜用其何才況伊本任豈無經手要件然既已調防亦不必遣撤惟不得藉圖保舉○浙江巡撫胡興仁奏投誠匪犯王彝身於立功後紳董稟請正法見交甯防帶兵大員責令隨同打仗得旨著照所擬辦理該紳等於王彝身投誠一事豈無聞見何得如是專擅將來該犯果有功績必應將該紳董等懲處以爲妄稟者戒汝身爲大吏惟期賞罰持平豈可畏紳士抑平民爲調處說合之人耶此事不准遺忘○癸卯諭內閣昨因兵

部奏庫倫辦事大臣德勒克多爾濟等處分未會理藩院批令逐層明白回奏茲據全慶等稱接到理藩院咨文該部司員並未回堂徑行咨覆由部主臺請將司員嚴議並自請議處等語兵部於應會理藩院具奏之件疏漏不會已屬輕率所引從前議處僧格林沁成案係兼在京武職亦與此案不符所有不候堂畫輒行片文之職方司掌印郎中啟賢總辦郎中程均著交部嚴加議處失察之該部堂官著一併交部議處所請欽派大員研訊之處著毋庸議○諭和春奏查明已故提督子嗣見在原籍等語已故浙江提督鄧紹良卓著戰功臨危授命業經降旨賜卹伊子光祿寺署正銜鄧亨先著俟服闋後交部帶領引見候朕施恩至鄧紹良之父原任湖南平江縣訓導鄧士儼年逾八旬並著加恩賞銀四百兩由湖南藩庫給領用示朕優卹蓋臣有加無已至意○諭前因

署安徽按察使恩錫在途患病當經降旨准其暫行回京就醫毋庸開缺仍著該旗都統等查看俟病痊卽飭令赴任茲據奕諒等奏該員在京調治已逾兩月據稱難望速痊呈請開缺經該旗都統等駁斥該員仍欲展假兩三月顯係有心規避恩錫著先行交部議處仍著該都統等飭令前赴安徽署任毋許逗畱○諭軍機大臣等英桂奏籌撥餉項不敷擬試抽釐稅一摺據稱山西省連年籌解京協餉項及部撥各款爲數甚鉅多藉助於捐輸見在俯察輿情自疊次捐輸之後未能踴躍惟有仿照各省抽收釐稅尙可酌盈劑虛自係一時權宜之計著照所請除有關民食及零星販賣者均毋庸抽收以示體恤其餘當酌議簡明章程分別省內省外設立總局分局慎選委員責成地方官妥爲經理毋許抑勒滋擾並嚴查影射侵漁之弊庶不至有名無實如試行有效再行

定議具奏。儻有窒礙，卽行停止。將此諭令知之。○甲辰，諭內閣文彩、穆蔭奏審明佐領呈訴刑部堂司並呈控領催等扣留軍餉按律定擬一摺。此案鑲白旗蒙古佐領哈豐阿呈控領催額林布句串騎都尉雙祿扣留軍餉審訊屬實。惟所供刑部堂司各官授意串通濫傳刑偏等情，係屬懷疑妄控。哈豐阿申訊不實。著交部議處。已革佐領瑞全輒敢在哈豐阿身後辦事於領米時私卸米石侵用餘米。錢文著照所擬銷除本身旗檔發附近充軍騎都尉雙祿業已交卸佐領，猶復於打米時帶車上倉並在米折項下擅支錢文著交部議處。刑部右侍郎孟保雖無授意司員情事，惟於該旗封印時輒向哈豐阿提及刑部見審情節致該員有所藉口著開侍郎缺毋庸交部察議。刑部員外郎志勳於問案時向哈豐阿說案係該旗送來不能不辦恐被參處亦屬措詞失當著與率將

此案回堂送部之參領德明章京恆壽一併交部察議○諭軍機大臣等德興阿奏請添募壯勇以資助剿一摺據稱江北軍營兵勇共止一萬四五千人在六合賊黨日添恐其伺隙紛竄擬添募壯勇數千人以資堵剿係爲速掃賊氛起見著准其卽行添募惟所募之勇務須技藝嫺熟年力精壯者方可望其催堅陷銳儻徒事貪多濫行招致不獨臨敵之時慮其潰散且當此軍需支絀豈容以有用之餉養此無益之兵著德興阿覈實辦理毋涉虛糜至六合縣城不克則金陵接濟不斷於江南北軍務大有關係該大臣以全力攻一邑何竟日久無功著卽督飭將士實力攻剿速籌克復毋得再有延誤將此由六百里諭令知之○諭據德興阿奏請添撥餉需一摺江北馬步兵勇統計一萬四五千入月需正餉銀六七萬兩見因兵力太單擬添募壯勇助剿必須月籌正餉

國朝典章 卷一百一十五 三

銀十萬兩方足以資軍食著何桂清轉飭聯英就近於淮南鹽課項下每月撥解江北餉銀一萬兩之外再添解銀一萬五千兩按月撥解毋稍稽延至各路軍營支絀籌餉維艱梁佐中見辦江北糧臺並著何桂清飭知該藩司覈實經理毋涉虛糜將此由六百里諭知何桂清並傳諭江甯布政使梁佐中署兩淮鹽運使聯英知之○調景廉爲刑部右侍郎以成琦爲工部右侍郎

由左副都御史遷

○乙巳 上幸圓明園○諭內閣恆福奏皖捻逼近豫境飭屬舉辦堅壁清野一摺軍興以來疊經諭令各直省督撫等於逼近賊氛處所勸諭團練興築塞堡茲據恆福奏稱以皖捻逼近豫疆親赴鹿邑督籌防剿並體察民情地勢莫如堅壁清野之法足資捍禦見已遴派道府大員於歸陳等屬分投興辦並親赴歸德接見紳耆開誠曉諭旬日之間睢州等五州縣興築堡塞者已數十處

聞風響應次第舉行所辦甚合機宜著照所請所有歸德府屬卽
責成候補知府傅壽彤陳州府屬卽責成候補直隸州知府蒯賀
孫會同地方官紳將訓練丁壯聯村築塞等事迅速勸導舉行其
光州屬及南陽府屬卽由在彼辦防之候補知府張曜何懷珍一
律勸諭歸陳兩府並著候補道周煦徵督率辦理聯絡聲勢該省
風俗淳厚且屢經賊匪蹂躪民情激而且奮該道周煦徵等務當
因勢利導於堅壁清野一切事宜實心籌畫庶幾眾志成城內以
靖宵小之竊發卽外以杜匪眾之窺伺不得草率粉飾虛應故事
該官紳等果能奉行不懈守禦得力或殺賊立功著有成效卽著
恆福查明覈實奏請獎勵○丙午諭內閣本日據和春奏捻首歸
城效順獻出江浦縣城並會同李世忠攻克浦口城池一摺據稱
有陷賊未久之辭之元踞守江浦縣城每思歸正無路可投經和

春等派令遊擊賴鎮海等許以免罪圖功辭之元感激涕零情願獻城自贖越數日遣其心腹羅華清等謁見張國樑旋即薙髮乞降獻出江浦縣城復約會滁州參將李世忠將金旺嶺賊營兩座全行攻毀斃匪數百人奪獲賊糧數百石復於正月二十七日將浦口城攻復殺賊無數該擒首自拔來歸旋又克復城池立功自贖自應優加獎勵以嘉其嚮化之誠辭之元著更名辭成良先行賞給四品頂帶俟續有勞績再由該大臣等酌量保奏其部下出力頭目並著查明分別奏請恩施以昭激勸○和春奏查擒首辭之元見在獻出江浦縣城復與參將李世忠會復浦口該兩城雖經收復惟德興阿一軍移紮猴子鋪地方未能得力且近時舉動益形乖謬以致軍無鬪志怨謗叢生若再以江浦浦口之事責令守禦儻逆匪盡銳東趨必又以眾寡不敵爲詞復蹈上年故轍臣

與德興阿共事兩載從無間言前者浦營之變臣等先後分兵援應尙冀其力圖振作漸復舊規乃該大臣既潰敗於前復遷延於後縱寇殃民實出情理之外不敢不據實密陳又奏准浙江提督鄭魁士總兵張玉良等稟報南陵西河一帶逆匪因官兵步步進逼不敢久踞均已遠颺分股竄併蕪湖太平老巢其灣沚黃池之賊亦卽同時擊散鄭魁士擬卽會同水陸各鎮三路進兵規取蕪太一面咨令提督周天受由池州青陽一路轉戰而前所辦甚合機宜惟刻下浦口江浦各城甫經收復所有皖南之賊勢必紛紛北渡援應金陵臣已於高淳甯國畱防兵勇內抽調數千前來金陵分遣渡江仍飭鄭魁士等就見在兵力相機督飭分剿以冀肅清皖南東路上諭前因浦口兵潰江浦揚州等城相繼失守業將欽差大臣正白旗蒙古都統德興阿革職畱任並拔去花翎革

去騎都尉世職仍責令督辦江北軍務原冀其自知愧奮勉贖前愆乃揚州儀徵經張國樸督兵克復後德興阿尙復觀望遷延屢經嚴諭切責始往六合紮營日久無功未能收復德興阿著卽革任來京所有江北軍營馬步官兵著統歸和春節制○諭軍機大臣等慶祺奏遵旨傳知提鎮大員查看沿海情形繪圖貼說呈覽一摺除大沽河地方諭令崇恩酌度設防外所有由天津至山海關一帶海口內如北塘蘆臺近接大沽最關緊要礮臺一切急宜安置其澗河口等處礮臺土壘均被水衝刷蒲河口礮臺爲沙土屯掩秦王島礮臺牆垛損壞石河口礮臺須加寬加高安築營壘自應亟爲興修該督見派候補道春保前往督辦卽著偕格林沁慶祺責成該道會同各該地方官迅速修葺務期一律整齊毋許有名無實至海口地方較多所有防海各軍應如何擇要布置以

期嚴密並各海口礮位恐因安設年久未能得力應如何量加整
理隨時演放俾得適用之處並著僧格林沁慶祺悉心籌畫妥爲
辦理將此由五百里諭令知之○諭慶祺奏遵查沿海情形一摺
天津至山東海豐縣一帶海口經慶祺遵旨傳知總兵湯蘇等前
往查勘茲據該督奏稱查明狼坨子汎迤南之大山河卽大沽河
係山東海豐縣界該處河口長潮時約寬四五里水深四五丈落
潮時約寬二三里水深二三丈內有商船出入夏秋之交雨水盛
漲與海潮相迎則水勢較長附近之郭莊關莊有東省紮營舊址
係道光年間防夷所設請飭東省派兵防守等語大沽河海口水
面較寬且從前辦夷務時曾經紮營自係地關緊要見當海防喫
緊之際所有該處海口應如何派撥官兵駐紮以資扼守卽著崇
恩速行籌辦毋稍延誤將此由五百里諭令知之○諭和春等奏

擒首辭之元更名辭成良獻出江浦縣城並會同官兵攻復浦口
一摺已明降諭旨賞給四品頂帶其另片陳奏德興阿貽誤情形
亦經降旨革任卽令回京將江北官軍歸和春節制矣江浦浦口
均經收復則六合賊勢已孤張國樑見赴江北受降該提督謀勇
素優威望眾著卽可親往六合大營周歷布置惟南岸軍務緊要
該提督亦未便久離著和春於在營提鎮中慎選有謀有勇之員
可以獨當一面者迅速奏明作爲該大臣幫辦令其分駐江北專
督北岸諸軍俾張國樑得以南北兼顧至江北大營旣無欽差大
臣所有原派幫辦之鞠殿華成明毛三元自應一併撤銷著和春
詳加察看該員等何人尙能得力卽畱於北岸幫同和春奏派之
員督兵進剿其不能得力者卽行奏明撤退德興阿所領欽差大
臣關防並著和春派員護送進京至蕪湖太平爲金陵屏蔽該逆

接濟皆由此路昨據勝保奏報有逆匪在彼收稅之事若能將蕪太池州攻復則賊勢自蹙南陵等處逆眾既已遠颺鄭魁士周天受見已分路進兵卽著實力進攻斷絕賊援以爲攻拔金陵之計該大臣兼統南北兩軍責任綦重自當統籌全局力埽賊氛當此匪眾離心事機較順揜渠埽穴朕實有厚望焉將此由六百里諭令知之○諭據勝保翁同書奏請飭催各省欠餉並請將山東浙江藩司議處一摺已交戶部速議具奏並允勝保所請派傅振邦幫辦該大臣軍務矣傅振邦督辦三省剿匪事宜肅清淮北是其專責此次令其幫辦軍務原爲南北兩軍必須聯絡聲勢遇有通融商辦之處得以彼此合力其北路剿辦情形仍應由傅振邦伊興額隨時具奏以期迅速至該大臣片稱請飭邱聯恩駐軍鹿邑太和之間黃良楷專扼徐州後路堵截蕭碭曹單一帶固爲分堵

擒匪竄路但東豫官軍各駐本境則傅振邦兵力較單不足以資
勦辦該二省邊防固關緊要而進勦之兵尤應合力兜圍方能直
擣巢穴本日已諭知崇恩恆福仍遵疊次諭旨派兵出境會勦卽
著傅振邦等知照邱聯恩富新黃良楷合力進攻不可各顧一隅
轉成株守河南候補知府張曜見經恆福派在光州一帶辦理堅
壁清野能否專駐三河尖地方卽著勝保咨商恆福如不能兼顧
卽另派得力之員在該處駐守以免兩誤將此由六百里各諭令
知之○諭前因袁甲三奏請東豫兩省合力會勦擒匪並因擒匪
有春間出巢之信疊經諭令崇恩恆福迅派兵勇與徐州官軍約
期進勦嗣據恆福奏派出總兵邱聯恩等豫爲布置並據袁甲三
奏崇恩所派富新黃良楷統帶兵勇四千名定於開印後出境本
日據勝保奏請以邱聯恩一軍扼紮鹿邑太和之間以堵西北黃

良楷一軍專扼徐州後路會蕭礪曹單等鄉團力扼東北而以剿匪專屬傅振邦等惟兩省邊防固關緊要而傅振邦等兵力無多當此捻氛充斥若令東豫兩省官兵合守一隅深恐地大兵單不足以資策應著崇恩恆福仍遵前旨迅將派出前項兵勇會商傅振邦等定期出境進剿以期直搗巢穴兼可自顧邊防毋稍遷延致滋貽誤將此由六百里各諭令知之○命提督銜江南徐州鎮總兵官傅振邦幫辦欽差大臣勝保軍務仍畱北路督辦三省剿匪事宜○戊申諭內閣前據和春奏薛成良效順獻城並會同參將李世忠攻復浦口當經降旨賞給四品頂帶茲據勝保等奏稱薛成良與李世忠密議投誠訂期舉事旋爲粵逆知覺大股來攻江浦薛成良倉卒無援遂親往賴鎮海水營乞師夾攻殺賊甚多固守以待迨李世忠兵到立即舉城出降遂與李世忠等直趨浦

口乘賊不意首先進攻踏毀賊壘斃賊無算並陣斬懷天幅等賊渠多名殲斃生擒者一千數百名當將浦口克復是薛成良不特悔罪投誠當逆眾圍攻之時並能矢志不渝尤堪嘉獎著再加恩賞給三品頂帶並賞戴花翎以昭激勸其部下出力頭目已有旨令和春分別保奏著與賴鎮海水營出力人員一併查明請獎○諭軍機大臣等昨據和春等奏薛成良獻出江浦縣城並克復浦口當經降旨賞給薛成良四品頂帶本日復據勝保等奏薛成良投誠係李世忠招致並因其謀洩漏粵逆來攻薛成良仍無異志復加賞薛成良三品頂帶花翎李世忠亦加優獎矣德興阿革任後和春總統南北諸軍接奉前旨自當通籌全局力圖整頓德興阿所統江北全軍爲數不少張國樑見在江北正可乘此銳氣督率各軍並令薛成良新降之眾同擣六合迅速攻克以孤金陵之

勢至李世忠一軍勝保本欲令其進取和州似應先行助剿六合亦經諭知勝保酌量辦理再前據德興阿奏請給翎枝銀兩業經准其所請惟因此後續保人多應如何限制令德興阿酌定章程具奏茲據奏稱除從征多年之兵酌量加給外其新調各募勇概不給予銀兩等語如此區別是否允洽並著和春等妥議具奏將此由六百里諭令知之○諭前因皖軍需餉甚急當經諭令何桂清於江蘇藩庫內迅撥銀四五萬兩解赴勝保等軍營應用茲據勝保等奏稱前撥之款迄今仍未據解到安徽軍營缺餉幾有懸釜待炊之勢何桂清兼轄兩省尤當不分畛域速籌接濟著該督撫仍遵前旨將飭撥四五萬兩之數迅即派委妥員解赴勝保等軍營以應急需不得稍涉延宕致誤事機將此由六百里諭令知之○以招降收復江浦並攻克浦口出力賞參將李世忠巴圖魯

名號以副將用○庚戌宗人府等衙門奏定擬貧夜夥眾強搶盜
犯罪名內有宗室綿成係已革奉恩將軍應如何治罪請旨定奪
得旨綿成身係宗室起意接搶事後分贓兇暴眾著實難恩施法
外著派右宗人載岱卽日帶領章京將綿成帶至伊墳塋處所飭
令自縊以昭炯戒○辛亥諭內閣王懿德奏官軍克復連城閩省
被擾地方一律收復一摺福建省匪徒竄踞連城縣經王懿德督
飭官軍疊次痛剿並飭署總兵豫祺副將王捷元參將袁艮等督
帶兵勇剋期收復正月初九日城內出賊數十四面包鈔袁艮奮
身督隊斬獲不計其數初十日諸軍復分投進剿逆匪傾巢出撲
各軍奮力攻擊斃賊無算餘匪由四堡竄逃當將城池收復此次
粵匪竄入閩境勾結土匪所至滋擾該督撫等疊將汀州甯化等
府縣克復餘匪尙踞連城茲復痛加剿洗立拔堅城閩省地方可

期全境謐安辦理尙爲妥協在事出力員弁兵勇准由該督等覈實保奏候朕施恩仍著督飭臬司裕鐸署總兵豫祺等將竄逃殘匪殲除淨盡並分別解散脅從以靖地方○諭軍機大臣等前因德興阿革任降旨將江北官軍統歸和春節制並令慎選大員奏明作爲幫辦大臣分駐江北專督北岸諸軍和春等接奉後諒已遵照辦理本日據勝保等奏李世忠截剿回撲浦口賊匪復獲大勝並請飭德興阿派兵駐守浦口各等語江浦浦口雖經克復而六合一邑尙爲賊踞亟應一面進攻一面分守江浦浦口以免賊匪復行竄踞勝保因廬州之賊時有蠢動李世忠一軍未便遽畱江北商同德興阿派兵駐守令李世忠全隊抽撤回皖並酌撥官軍會合韓成良新附之眾協守江浦自係未知德興阿業經革任見在和春既節制大江南北諸軍亟應迅派謀勇兼優之員渡江

督辦六合之賊勢已孤立且本有德興阿所帶官軍進攻一經整頓自不難於克復江浦浦口爲金陵門戶賊所必爭和春調取甯國兵勇六千回營剋日渡江擬自江浦浦口以至九洲洲一律築壘開濠令鎮將大員督同薛成良降眾分守兩城所籌甚爲周妥著卽迅速辦理毋令再有疏失一面督飭各軍進取六合如能肅清北岸則剿辦自易得手其李世忠一軍已諭勝保飭令助攻六合薛成良降眾除派分守兩城外亦可分令助攻六合並著張國樑就近妥爲調度可也將此由六百里諭令知之○諭勝保等奏進攻高旺及截剿回竄浦口各匪均獲全勝並片陳浦口等處攻守情形咨商德興阿派兵守隘令李世忠撤隊回皖覽奏均悉浦口被匪撲入旋經李世忠等擊退必須重兵屯駐方保無虞德興阿業經革任江北各軍均歸和春節制前諭和春等選擇謀勇兼

優之大員前往江北統率德興阿一軍並以張國樑見在江北受降令其乘勝督兵進攻六合又諭勝保令李世忠隨同攻剿俟六合克後再赴和全等處該大臣諒已奉到諭旨卽行遵辦惟此時浦口被賊撲入幸未再失所有江浦浦口二處必得和春等派兵前來守禦方能令李世忠助剿六合本日已諭和春酌辦其薛成良降眾亦著派令助剿六合至江浦一城江南派兵未到以前卽著勝保等酌撥官軍會合薛成良新附之眾併力協守該大臣素能不分畛域著就近與張國樑商酌通籌緩急相機辦理爲要將此由六百里諭令知之○壬子諭內閣前據勝保等奏各省協餉懸欠太多請飭催解並將浙江山東藩司從重議處一摺當交戶部議奏茲據該部覆奏請嚴定章程等語浙江山東藩司於奉撥皖餉或報解甚少或並未報解殊屬玩視軍需著各該撫查明因

何延宕迅速具奏至各省欠解皖餉爲數甚多著照單開各項嚴行催解其咸豐八年七月前積欠一併開單嚴催嗣後各省藩司奉撥軍餉延不報解著吏部從重覈定處分如有並未奏請改撥擅自遲逾積欠者卽著戶部查明指參照新定章程議處以重軍務而濟要需○諭軍機大臣等何桂清奏臚陳辦理通商機宜一摺前因廣東距京寫遠夷情不能遽達致令藉端生事欲赴天津是以移欽差大臣於上海並知何桂清才力能副斯任援兩廣總督之例授爲欽差大臣辦理通商事宜茲據奏請簡派專員駐紮上海議給養廉以崇體制至總督距上海較遠事未身親目擊恐措置失宜並恐該夷遣人往來似多窒礙等語從前兩廣總督兼欽差大臣遇有各國議事先派員接見原非事事與總督面議葉名琛並不派員接見相視太輕而又不設備故爾釀成此變如果

操縱得宜亦不至蔑視督撫況總督爲地方大吏足資彈壓若另設欽差以京中大員任之恐遇事呼應不靈見在撫局尙未大定所有應辦各事宜俟互換和約後朕當再行詳諭該督欽遵辦理可也至該督已授爲欽差大臣卽當與桂良等設法阻止進京入江等事未可徒託空言至撫議已成所有條約自須頒發通商各省一體遵行然須仍歸欽差酌辦以一事權其有據情代奏之件該大臣必當擇其無傷國體者方准代爲上達從前辦理夷務時圖山關曾設礮臺見在是否尙存該處爲入江要隘著何桂清察看形勢酌撥兵丁密加防守以備不虞○諭恆福奏捻匪分股西竄派兵前往邊界嚴防並因豫軍分紮淝河口兵力甚單請飭傅振邦酌撥官兵前往會剿一招見在捻眾欲分股西竄陳州圖擾禹州等處並沈邱邊界賊鋒亦已逼近該撫已知照邱聯恩撥兵

馳赴沈邱相機堵剿並調滿營馬隊及考城防兵派員帶赴淝河口駐紮又截畱陝甘兵三百名亦飭前往該處扼守自係移緩就急所辦尙屬妥協惟捻匪見旣充斥三省會剿事宜亟應迅辦與其在本省邊界分防不如出境會剿更可力遏兇鋒所慮豫兵不敷防守所有陝甘官兵後起尙有四百名著卽一併截畱以厚兵力該撫仍遵前旨迅圖出省會剿毋守一隅至邱聯恩旣因鹿邑緊要礙難移紮淝河口該處僅有兵九百名恐難遏賊分竄亦係實在情形惟徐州一帶捻眾勢亦鴟張能否分撥馬步官兵二三千名馳赴淝河口會剿之處著傳振邦體察情形酌量辦理將此由六百里各諭令知之○戶部遵議浙江巡撫胡興仁奏請截畱鹽課及緩解積年京餉請飭按限批解得旨舊欠已多尙敢請緩豈獨有意延宕直視京餉爲無關緊要殊屬膽大胡興仁楊裕深

著交吏部分別議處○兩江總督何桂清奏謝授欽差大臣恩得
旨卿之才力足副斯任惟願汝以大局所關爲念不可任意更張
務期全國體籌國用奠民生以杜官吏之侵漁以絕劣紳之覬覦
朕有厚望焉○楊載福奏查安慶解圍後賊復分股四出臣當派
副將李成謀遊擊劉正隆等趕赴武漢蘄黃一帶巡防江面臣親
督各營駐紮黃石磯所有長江各要口均已節節嚴防略無罅隙
安慶以上沿江兩岸無賊臣不時派隊攻擊皖城該逆負固不出
復於安慶下游擄有民划改作礮船希圖偷襲並探聞逆首陳玉
城大股上犯楚疆臣卽於正月初八日起時時派隊薄城以牽賊
勢十三日該逆礮船渡江我軍出賊不意突前轟擊奪獲礮船十
四號擊斃賊匪多名臣仍嚴飭各營密防南北兩岸其見駐黃石
磯觀音洲兩處戰船時復調派出擊以期迅克安慶報聞○子河

南殉難通判王可思祭葬世職建祠○癸丑諭內閣惇郡王奕誼等四子著命名載瀛○諭鄭魁士奏官軍克復灣沚並埽平賊壘一招逆匪占踞灣沚經鄭魁士督派參將鄭朝棟等分路進攻誘賊出巢開放槍礮立斃賊匪百餘名並擊斃黃衣騎馬賊二名該匪仍敢死拒官軍奮力直前槍礮連環佐以噴筒火礮逆勢不支官軍乘勢壓下斃賊八九百名生擒九名餘匪乘夜竄逃正月二十四日卽將灣沚收復黃池之賊經鄭魁士飭副將朱承先等扼紮要隘一面親督各軍馳往進剿將南岸八座賊壘一律毀平其北岸賊壘仍著該提督乘此軍威迅圖肅清○諭軍機大臣等前因副都統吉拉明阿輕許俄夷赴烏蘇里口會勘地界當諭奕山景瀄查明具奏並令將字約十四條一併查奏旋據景瀄覆奏吉拉明阿令俄夷俟冰泮後再行會勘係一時推緩之言與本日奕

山奏報大致尙同惟綏芬河烏蘇里河既不與俄夷接壤當時卽應拒絕何以含胡推緩致令藉口至所稱廟兒地方舊有分界石牌據景瀄原奏稱係通事傳聞之語況該處尙在綏芬烏蘇里池東與俄夷見占之闊吞奇咭相距甚遠亦豈能任意牽涉指爲接壤之據其字約十四條雖稱商議未定亦當先行入奏豈有俟夷酋覆定再行進呈之理設或其中有不能俯允之處豈非又費唇舌且所許二年後差學生到俄夷屯中學藝將來不能如約亦徒費周章吉拉明阿辦理夷務任意顛預著先行撤任並著奕山據實參奏所有黑龍江副都統一缺著奕山遴選明白幹練之員切實保奏或卽簡放是缺或先行署理聽候諭旨遵行其字約十四條何款議定何款尙須更換仍著奕山查明具奏夷酋石沙木勒幅如已到黑龍江城該將軍務將綏芬河烏蘇里河不與該國接

壤之處詳細開導據理剖辯毋得再有含混自干咎戾將此由五
百里各諭令知之○諭前因甯國兵勇需餉諭令胡興仁於每月
解銀六萬兩外添解二三萬兩合之皖南道月籌三萬兩共湊成
十二三萬之數嗣據胡興仁覆奏本年正月內共解過甯防銀九
萬兩其皖南道應解之三萬兩卽由鄧瀛就近解交本日復據鄧
魁士奏江浙暨徽防援軍見又添一萬六千之多需餉甚鉅甯郡
僅六邑而宣城南陵甯被蹂躪其餘彈丸之地籌畫維艱鄧瀛月
籌之三萬兩已成畫餅見惟仰望浙省請飭月籌二十萬兩各等
語甯防各軍見在攻復灣沚埭平黃池南岸賊壘正擬乘勝進兵
其餉項急宜寬爲籌備著胡興仁設法籌措每月起解卽不能如
所請二十萬兩之數亦須酌量加增俾敷攤放設有缺乏不獨停
兵待餉抑且潰散堪虞貽誤非輕前車可鑒該撫總當竭力籌畫

勿以皖南每月三萬爲必可恃也將此由五百里諭令知之○展
晉濟堂功德林煮賑兩月○甲寅 上御勤政殿召見惠親王怡
親王載垣鄭親王瑞華軍機大臣彭蘊章穆蔭匡源文祥內務府
大臣瑞麟麟魁文彩存佑文豐尙書肅順全慶陳孚恩趙光許乃
晉諭曰本日據載垣等奏會審科場案內已革大員並已革職員
定擬罪名先行擬結一摺朕詳加披覽反復審定有不能不爲在
廷諸臣明白宣示者科場爲掄才大典交通舞弊定例綦嚴自來
典試大小諸臣從無敢以身試法輕犯刑章者不意柏葭以一品
大員乃孤恩藐法至於如是柏葭身任大學士在內廷行走有年
曾任內務府大臣軍機大臣且係科甲進身豈不知科場定例竟
以家人求請輒卽撤換試卷若使靳祥尙在加以夾訊何難盡情
吐露既有 成憲可循朕卽不爲已甚但就所供情節詳加審覈

情雖可原法難寬宥言念及此不禁垂淚柏葑著照王大臣所擬
卽行處斬派肅順趙光前赴市曹監視行刑已革編修浦安已革
舉人羅鴻繹已革主事李鶴齡均著照例斬決以昭炯戒副考官
戶部尙書朱鳳標於柏葑撤換試卷閣中並未查詢出場後又不
卽行參奏若照舊例辦理知情徇隱卽應治罪卽止於失察亦應
研訊惟閱其供詞尙無知情情弊諒朱鳳標亦不敢公然徇縱從
寬卽行革職同考官降調編修鄒石麟爲已革舉人平齡更換硃
卷實屬違例著革職永不敘用其磨勘查出試卷應行查辦之舉
人余汝偕等十二名並同考官徐桐鍾琬涂覺綱何福咸對讀官
鮑應鳴應得處分著交禮部查照科場條例定擬具奏至墨卷內
更改馬丞字樣是否由外簾傳遞之處著原派之監臨明白回奏
另片奏催未經到案之謝森墀熊元培李旦華等三名著江蘇巡

撫卽行派員迅速解京歸案審訊嗣後科場大典秉文衡者皆當
潔己虛懷杜絕干請應試士子亦各立品自愛毋蹈夤緣覆轍則
朕此次執法嚴懲正爲士林維持風氣爾在廷諸臣當能默喻朕
衷也○乙卯諭內閣張芾奏官軍攻克婺源縣城一摺安徽婺源
縣城於上年八月內失守自署皖南鎮總兵江長貴接辦防務後
疊次攻剿獲勝本年正月密派得力將弁斷其接濟並督隊更番
疊進直薄城下乘賊目張淙相等顛覆乞降遂會合總兵李定太
進擊正月二十八等日疊獲大勝二月初一日江長貴會同各軍
進逼廬戰七時之久俘馘無算斬隘直入立復縣城我軍乘銳尾
追卽於是夜將高沙賊壘一律毀平餘匪由西路竄逸著張芾仍
嚴飭在防將弁探明賊竄何處一面嚴扼要隘一面分投追剿以
期淨掃賊氛勿畱餘孽○諭軍機大臣等本日據張芾奏官軍克

復婺源縣城一摺據奏另將克復詳細情形咨由浙江巡撫嚴明具奏張芾以候補京卿督辦徽郡防務駐紮該處見聞較確軍情旦夕變遷若事事咨由浙江巡撫轉奏轉恐有稽時日嗣後遇有緊要軍情卽著張芾隨時專摺奏報以重軍務而免稽延將此由六百里諭令知之○調周祖培爲戶部尙書命賈楨以大學士銜爲吏部尙書前大學士○丙辰頒 硃諭近因柏葰等聽情關節一案已降旨從嚴懲辦矣著上書房總師傅彭蘊章等恭錄前旨一道存貯諭旨匣內以垂久遠以昭法則○勝保奏接奉 硃批訓斥瀝陳愧悔下情得旨能知謹慎卽汝之福○丁巳諭內閣德興阿奏進攻龍池賊壘大獲勝仗一摺六合縣城業已面面合圍惟城外西南隅龍池地方尙有賊壘三座該逆派悍賊踞守恃爲犄角本月初八日德興阿派令富明阿進攻龍池四面兜圍連開槍礮

施放噴筒火箭焚其更篷瞭樓逆勢不支自相踐踏斃賊約一千餘名生擒四十餘名奪獲旗幟器械不計其數當將龍池賊壘三座一律踏平經此次痛加懲創絕其應援六合一城已成孤立著和春飭令將弁兵勇乘勝攻取迅圖克復○諭軍機大臣等翁同書奏逆匪闖入六安州城請飭楚豫兜剿一摺該州甫經收復於二月初四日被大股逆匪竄入該撫見商勝保回定遠剿辦惟此股本係舒桐潛太匪黨知楚軍由宿松進兵因分路竄擾先有竄霍山後再行合夥由商城邊界繞出麻城牽掣楚軍之信嗣又有欲由葉家渡圖撲固始之語其黨爲逆賊陳玉城所統帶最爲兇悍今旣竄陷六安楚豫邊界亟應一律堵剿湖北官軍本由宿松進剿著官文胡林翼督飭多隆阿等確探賊蹤迅卽進兵剿捕此次匪眾以數萬計必須厚集兵力方能有濟並著恆福於商固一

帶添兵堵禦一面商同勝保傅振邦等不分畛域聯絡一氣力遏該匪北竄之路是爲至要將此由六百里各諭令知之○諭翁同書奏賊匪闖入六安急需調兵攻剿一摺據稱潛山霍山賊匪突撲六安已革藩司李孟羣派兵往援該匪已進州城見在飛咨勝保速回定遠籌議會剿等語逆賊因楚軍自宿松上剿兼之江浦來歸勢急紛竄以冀牽掣我兵六安州城收復未久復被賊踞亟應趕緊堵剿以免蔓延勝保見由竹鎮集汭澗赴天長盱眙著卽折回定遠督飭各軍奮力剿擊迅克州城臨鳳尙未獻出張落刑敗歸懷遠仍負隅抗拒土匪蜂起捻勢復張粵捻聯爲一氣李孟羣一軍恐不足剿辦六安之賊著勝保翁同書迅派弁兵馳往協剿毋令該匪久踞並查明文武下落具奏本日據德興阿奏進攻六合踏平逆壘三座等語六合之賊經德興阿奮力剿洗計日可

以克復著勝保仍遵前旨飭令李世忠協力攻剿毋稍遲延至兵
餉梗阻亦須自行提催撥兵護送方無遲誤將此由六百里諭令
知之○諭前因恆福奏擒匪分股西竄豫軍兵力甚單請飭傳振
邦撥兵前往曾諭知該總兵能否分撥馬步官兵二三千名馳赴
淝河口會剿之處卽體察情形酌量辦理本日據翁同書奏潛霍
大股賊匪由南路闖入六安又探聞悍賊陳玉城一股復竄至霍
山並潛山逆匪擁眾萬餘欲由六合一帶竄往商城固始等處情
形均甚喫緊亟須調兵攻剿已諭知官文胡林翼恆福分路截擊
惟皖豫交界防剿之處太多兵力仍形單薄傳振邦係督辦三省
剿匪事宜尤應統籌兼顧著與伊興額撥兵會剿並著商同恆福
務於河南一帶力遏該匪北竄之路是爲至要將此由六百里諭
令知之○己未胡林翼奏據英山羅田麻城等縣稟報賊匪數萬

人分股竄入霍山六安繞出黃州之北面窺伺上游臣於二月十二日移營上巴河以期隨機防剿似不宜歸併下游致使兵勢偏重一隅儻賊匪竟由六安直犯麻城黃安則距太湖大營五六百里距黃州僅百餘里該郡見有兵六千人獨當一路尙堪抵禦如或分股竄擾屆期審實情形必須咨商官文都興阿於太湖各軍抽撥上援一俟上游無虞邊防稍固再遣將抽兵分途進剿軍興九年每苦於偏城壘一意攻堅士卒摧殘壯志暗消而主將不覺及至援賊大至另股乘虛旁竄必致貽誤事機是官軍注重於前而賊計必轉襲其後官軍每以仰攻挫銳賊計轉以餘力勝虛卽如七年官軍併力規宿松賊從蘄州張家塆乘間竄入八年官軍併力規太湖於張家塆復設重兵賊又從霍山商城以陷麻城黃安各縣備一路而虛一路輒多顧此失彼之虞往事已然前車可

鑒見在太湖石牌之賊閉匿城中堅不出戰賊之狡計固欲以堅城挫傷士卒而轉於空處不備之處乘間抵隙狡焉思逞也默察情形賊已憑城設守必非近月所能奏功征皖必圖三路分進急切求才亦非近月所能酌定昨得都興阿來函足疾稍痊暫不離營則前敵調度有人尙不慮其遷延觀望臣查黃州一郡形如圓甌其東爲黃梅與太湖宿松接壤其東而稍北爲蘄州蘄水又北而羅田其北則麻城黃安皆與六安霍山潛山英山商城固始接壤地勢散漫防不勝防是皖楚之要應以黃州爲適中安慶廬州六安未復則黃州宜設重防不僅目前情形當以黃州爲根本也臣若督兵前進轉恐援皖之師腹背受敵致使道路中梗餉糈缺乏實於下游軍情大有關礙且黃州一府財賦繁重甲於通省七年八年官軍血戰經營甫經底定得之甚難棄之可惜自以得尺

則尺得寸則寸養賢致民慎固不失爲要務蓋必保楚然後能謀
皖此又地勢兵勢之確切情形也惟鄂之謀皖已歷有年因兵止
一路總未得勢八年秋間分兵兩路已見功效然尙以賊眾兵單
前功盡棄今則統將又弱一个兵力復不如前率意輕進後患滋
甚臣愚以爲皖之地勢賊情非分三路併力進剿必難成功而鄂
省見在防剿江皖水陸馬步已五萬餘人加以協濟侍郎曾國藩
水師彭玉麟各營餉糈統計每月需銀三十六萬兩每月自籌二
十餘萬兩月欠十餘萬兩添兵則苦於餉糈之竭分兵又苦於統
將之少湘中將才如江忠源羅澤南李續賓王鑫等連年彫謝急
宜訪求造就庶幾繼起有人蓋地方得人則財用之源可開將領
得人則兵可戰可守目下征皖之師必須統將中智略過人者分
爲三路期以一二年委用而責以成功容臣次第訪求專意延攬

再行陳奏至鄂居皖省上游鄂軍得勢則地利人和較之他省情形迥異是討賊之責鄂省實無可推諉臣當與督臣專意籌商分別奏報 上嘉之○庚申諭軍機大臣等前據玉明等奏奉天盜風日熾請將罪應斬決盜犯先行正法等語當經批諭依議辦理矣茲據給事中李鶴年奏奉天省自上年秋冬以來盜賊肆行山海關外各州縣劫案尤多本年會試舉人式金等在廣甯縣界被劫錦縣舉人承惠等在縣屬連山地方被劫舉人金蕃會試咨文亦被搶不能來京應試等語奉天爲根本重地弭盜安良緝捕尤關緊要該舉人等有志觀光中途被劫著玉明等嚴飭各該州縣務將此案賊犯並獲照例嚴懲並令該舉人等先行進京毋許因案羈畱致誤應試至該給事中奏稱盛京刑部侍郎和潤賦性優柔煦煦爲仁養癰貽患甚至司員得賊賣放將捕盜之人照誣良

例反坐以致盜賊毫無顧忌等語著王明等確切訪查據實具奏毋稍徇隱所有該省斬決盜犯著仍照王明等前奏一經審實卽先行正法一面奏聞毋庸聽候部覆致稽時日以資整頓而靖地方原摺著鈔給閱看將此諭令知之○壬戌諭內閣直隸總督慶祺由庶吉士授職部曹洊升卿貳咸豐四年由倉場侍郎帶兵在獨流鎮等處追剿粵匪出力賞加勇號擢任西安盛京將軍上年六月調任直隸總督宣力中外懋著勤勞正資倚畀昨據奏稱感冒風寒當經賞假半月調理方冀病痊銷假遽聞溘遊悼惜良深著加恩追贈太子太保銜照尙書例賜卹准其入城治喪任內一切處分悉予開復應得卹典該衙門查例具奏伊子翰林院庶吉士延煦著俟百日孝滿後由宗人府帶領引見候朕施恩以示優卹蓋臣至意尋予祭葬諡恭肅○諭軍機大臣等本日據官文等

奏請調取西丹並籌備戰馬一摺業經由四百里諭知奕山令其挑選槍箭嫻熟堪資得力者湊足一千名卽交該協領巴揚阿管帶赴楚其請調戰馬一節因見在大凌阿馬匹無可再撥各城勸捐亦恐無此力量亦已諭知奕山如不能湊足二千匹之數卽酌量減少其或捐或買再由該將軍酌辦矣該大臣等所籌備之銀二萬兩卽可飭令委員隨同派出之巴揚阿襄帶前赴黑龍江以便發給西丹等整裝之用所請調四川山西陝西兵餉業經分別寄諭各該督撫迅速撥解其閩餉一節已諭令戶部改撥矣將此諭令知之○諭官文等奏請撥西丹並籌捐戰馬赴楚一摺楚省見籌併力東征其得力堪戰之馬隊不足千名教練馬隊亦恐緩不濟急東三省騎兵素稱勇鸞請飭調取西丹一千名據稱已籌備銀二萬兩派見在軍營之協領巴揚阿襄帶前往黑龍江交奕

山查收爲此項西丹整裝之費黑龍江馬隊固稱得力惟新挑之西丹是否堪以出陣著奕山認真選擇如實有槍箭嫻熟堪資得力者卽著添足一千名交巴揚阿管帶赴楚毋稍遲誤至請調戰馬二千匹一節據稱卽在本地各城勸捐或在大凌河馬羣內撥給見在大凌河馬匹已屬無可再撥各城勸捐亦恐無此力量湖北帶往銀二萬兩除發給西丹整裝外若再採買馬匹亦恐不敷著該將軍酌量辦理如不能湊足二千匹之數卽行酌減亦無不可將此由四百里諭令知之○以恆福爲直隸總督瑛棨爲河南巡撫祥裕爲河南布政使恩麟署甘肅按察使

由候補道署

○癸亥諭

內閣和春奏帶兵大員戰功卓著等語江南提督張國樑帶兵剿賊以來時閱數載勤勞茂著上年揚州儀徵失陷該提督渡江援剿於兩旬之間先後收復旋卽回軍攻克溧水實屬調度有方著

加恩賞給三等輕車都尉世職廣西右江鎮總兵李若珠每戰必先素稱勇敢此次隨同張國樑克復儀揚並於江甯鎮等地方奪獲賊壘斃賊多名亦屬著有勞績著加恩賞穿黃馬褂以昭懋賞

○和春奏查江浦浦口兩城收復後業經飭派總兵李若珠周天培帶兵渡江並由張國樑親赴該處相度布置擬自江浦以至浦口分屯扼紮步步爲營然後開濠築牆以資抵禦金陵首逆始可坐困正在部署諜報皖北援賊十萬長驅下竄聲言攻撲江浦分股屯踞汧河口等處張國樑當飭李若珠等於二月初九日迎頭禦敵馬步更番衝盪該逆披靡不敢抵抗紛紛退敗十一日該逆又分六路直撲浦口李世忠營盤張國樑正在矚度形勢遙見賊匪三股直犯浦營屯伏九里山截我進路當派李若珠等同時進剿張國樑親督各軍直前衝突賊勢辟易突有悍賊數千由九洑

洲鈔截後路兇餒甚張國樑卽飭劉萬德等整旅山岡槍礮轟擊該逆紛紛倒斃我師乘勝前驅直抵浦口時逆股圍營甚急官兵前後包鈔斃賊二千餘名賊勢散而復聚分爲七股各居高阜大半圍撲江浦東西北三門其餘並橫截浦口大道李若珠等各帶所部分路環攻周天培首先躍馬直搗中堅各軍乘勢搶上山岡殺賊無算時已薄暮始收隊回營此次援賊合皖江南北各路暨黃池灣沱潰匪同時下竄不下七八萬人先經占踞烏衣鎮汊河口等處銳意攻奪江浦浦口以援金陵臣見已催趙後路官兵並檄調東壩等處畱防兵勇剋日渡江助戰以勦爲堵至江北軍務奉旨由臣兼轄並飭慎選在營提鎮一員分駐江北查有副都統富明阿沈毅善戰膽識俱優於北營地勢軍情尙能洞達合無仰懇 天恩俯准飭令幫辦臣營軍務仍由張國樑往來商辦實

於江北有裨 上諭江浦浦口兩城收復後皖北各路悍賊及黃池灣沚潰匪同時下竄不下七八萬人意在攻奪兩城以援金陵張國樑飭李若珠等迎擊斃賊二千餘名賊又分股攻撲江浦並橫截浦口大道我軍分路夾擊殺賊無算餘賊奪路狂奔著和春嚴飭在事將弁認真堵剿迅掃賊氛○諭甯古塔副都統富明阿著幫辦和春軍務○諭軍機大臣等桂良等奏探聞額酋見在香港專候新公使普魯斯同赴上海卽送其進京未進京之先不必議辦粵事等語桂良等能否阻止尙未可定偕格林沁到津以後布置自己周密仍著勤加偵探嚴行防範桂良等原摺並進呈新聞紙均著鈔給閱看將此諭令知之○甲子諭內閣恆福奏皖捻竄擾歸德府屬闌入甯陵縣城旋即克復一摺安徽亳州捻匪聚眾竄擾豫疆經歸德府知府孫鳴珂等督兵堵剿該匪恃眾西竄

於本月十一日撲至甯陵縣屬溝香集地方知縣龍德照率勇擊退斃匪十餘名並救出難民奪獲車輛甚眾是夜賊復分三股廝至龍德照奮勇督戰因城池殘破遽被逆匪闖入該縣屬賊不屈登時被害十二日辰刻孫鳴珂等援兵悉至斃匪甚多立將城池收復著瑛榮嚴飭將士將此股敗匪迅速撲滅毋任蔓延○予河南殉難知縣龍德照祭葬世職建祠○乙丑諭內閣曾國藩奏官軍馳抵南康勦匪大勝攻克新城墟等處賊巢並赴援信豐一摺逆匪自攻陷南安之後聚眾數萬由南康直犯贛州占踞新城墟及池江地方正月十七等日蕭啟江令管帶田勇之知縣周慶榕等設伏誘賊分路截擊殺賊甚夥正鏖戰時又到悍賊七八千名我軍奮力死戰又將匪眾擊敗攻克新城墟賊巢除田勇斬獲不計外楚軍斃賊二千餘名生擒二百十名陣斬偽渠帥等賊目多

名二十日進攻池江賊巢計斃賊三百餘名生擒十九名二十四日官軍仍伏兵誘賊轟斃多名立將池江小溪鳳凰城長江墟等處賊巢一律焚毀勦辦尙屬認真著曾國藩飭令蕭啟江等迅解信豐城圍以圖克復南安毋稍遲延○丙寅諭軍機大臣等昨據桂良等奏夷情叵測一摺所稱上海換約及另立專條之說均未與該夷明言是該大臣等辦理此事至今尙無把握見在額酋到粵已久如日內折回上海該大臣等仍應與該夷議明在彼互換和約桂良等具有天良自必竭力補救惟夷情狡執該大臣等迫於時勢亦屬勢處兩難該大臣之苦衷已在朕洞鑒之中因思駐京一節爲患最鉅斷難允行至進京換約如能盡力阻止更屬妥善儻該夷堅執不肯務須剴切言明議定由海口進京時所帶人數不准過十名不得攜帶軍械到京後照外國進京之例不得坐

轎擺隊換約之後卽行回帆不許在京久駐以上各條如肯遵辦我等卽一面奏明一面先行回京約定日期俟我等到京後爾國船隻方可前赴天津庶不至在海口久候如此明白曉諭該夷自必俯首聽命其餘三事卽可乘勢開導儻能消弭一事卽日後少受一事之累如不能全行挽回亦當於三事中予以限制以杜該夷無厭之求何桂清係五口欽差大臣責無旁貸一聞該夷酋回滬卽與桂良等同至上海尤應盡心籌辦王有齡辭煥吳煦均能熟悉夷情著卽先行派往遵照諭旨次第妥辦如該夷堅欲進京換約何桂清卽於王有齡等三員中揀派兩員隨同桂良等馳驛來京辦理免致該夷藉口逗留桂良等上年在津於夷人駐京等事件率行允許已屬咎無可辭方冀前往上海可以逐漸挽回乃數月之久迄無實濟此次准其進京換約實萬不得已之舉該大

臣等若能仰體朕心總須在上海互換和約方爲妥協諒不至因朕有此旨桂良等即可將就諉卸也將此由六百里諭知桂良花沙納何桂清並傳諭段承實知之○熱河都統常清奏調錫林郭勒馬匹提解軍營得旨此不過遵奉施行並無的確信息何延到十二日之久覆奏任意遲滯殊出情理之外看汝近來辦事光景竟不似一品大員想無福受恩也○丁卯諭內閣曾國藩奏攻克南安府城一摺卽選道蕭啟江一軍攻克新城墟池江一帶賊巢後賊黨退保南安府城蕭啟江親率所部協同管帶練勇之知縣周慶榕等進紮青隴黃隴一帶會攻逆黨死力抗拒官軍鼓銳進攻斃賊二百餘名二月初三日兵勇分數路而進賊亦分路迎敵官軍槍礮刀矛同時並舉陣斬悍賊二三百名賊復奔潰入城各軍跟蹤而入或攀堞而登賊由西門奪路奔逃復追擊二十里殲

戮無算當將南安府城克復所辦尙爲得手周慶榕等官紳練勇
著耆齡覈實奏獎並卽責成搜捕餘匪以靖地方○諭前因曾國
藩奏伊弟曾國華殉難情形當降旨賞給曾國華之父曾驥雲從
二品封典本日曾國藩謝恩摺內聲明曾驥雲曾邀貤封正一品
封典等語所有曾國華之子曾紀壽著再加恩俟及歲時由吏部
帶領引見以示朕褒獎忠節有加無已之至意○諭王懿德等奏
克復龍巖州城一摺福建連城克復後餘匪竄入龍巖州城當經
王懿德等調兵進剿並飭令已革汀漳龍道英樸剋期收復英樸
卽派都司賴正修等帶勇進剿並由署該州知州福增武舉吳琪
各帶壯練協助護漳州鎮總兵梁翼之亦領兵進攻正月二十三
日夜我軍三路兜剿城內紳民乘機開城該逆四竄奔逃計殲斃
二百餘名生擒長髮紅巾逆匪多名卽在軍前正法立將州城克

復在事出力員弁及傷亡勇丁著該督等查明奏請獎卹○戊辰
諭軍機大臣等勝保等奏籌勦各路布置情形一摺其所稱十一
二兩日九洲夥賊來撲經李世忠擊退與和春前奏相符惟十
三至十五等日該逆又復添黨猛撲幸未挫衄而賊勢甚張張國
樑已由新江口紮營連至浦口南面固可無虞後路尙須兼顧見
經勝保飭派兵勇馳往烏衣鎮以冀順擣汴河小店斷賊來援惟
兵力尙單亟需江北一軍合力攻勦著和春等與勝保和衷其濟
遇有緊要咨調之事卽著富明阿一面迅速撥兵策應一面咨明
和春以免耽延貽誤再昨據鄧瀛奏皖南兵力雖足以守徽甯而
不足以清池太須合浙江江蘇江西三省併力掃蕩所籌關繫全
局並著和春等察看軍情如鄭魁士等軍見可進取江濱一帶卽
著酌量添兵相機勦辦將此由六百里各諭令知之○命翰林院

編修李鴻章工部主事于凌辰赴安徽軍營交正紅旗蒙古副都統伊興額差委○已已諭內閣張亮基奏練匪戕官撲城見已擊散一摺雲南已革副將陳得功係發往新疆重犯前經恆春奏畱邱北勦匪輒敢招集死黨擅殺平民與其兄陳得安狼狽爲奸斂錢肥橐不法已極茲復率眾搶獲民田蕎麥殺斃鄉民經該處鄉民忿極格斃原屬死有餘辜乃其餘黨瞿騰霄等猶敢假稱報復突入縣城戕官劫署廣西州知州彭克侗等帶兵往勦又復分股直撲州城實屬罪大惡極見在首匪瞿騰霄等業已生擒正法州城安堵其分踞邱北之匪亦已被勦潛竄著張亮基飭令該處文武分投追捕趕緊撲滅務將在逃之首匪朱開甲迅速弋獲盡法懲辦以儆兇頑○予雲南被戕知縣韓捧日等祭葬世職○庚午諭軍機大臣等僧格林沁奏接奉密寄諭旨覆陳籌備機宜一摺

據稱夷船如到天津擬以雞心灘爲限該處係在攔江沙內前次
諭令派員前往理論須至攔江沙外撫勦自不相妨文煜於二十
五日自省啟程計期已可到防著僧格林沁與之會商先行派出
明幹委員一聞夷船駛至卽迅速迎往詢其來意如果聲稱爲互
換和約而來可告以此間專候上海來信爾旣在彼議定則欽差
大臣亦必折回與爾了結此事一俟上海文到應令幾人進口此
間定當撥兵護送決不攔阻我中國總以誠信待人斷不失信若
無上海文移天津實難擅准或在攔江沙外等候或回上海候信
總不能遽行放入爾若闖入內河則民團鄉勇不免與爾爲難設
有損失地方官不任其咎總在派出之員隨機應變與之羈縻以
待桂良等奏到若竟恃其船多一擁而前直入雞心灘則是有意
尋釁亦不能不懾以兵威惟在僧格林沁相機酌辦至錫林郭勒

馬匹據慶昫奏到於二月十六日由左翼四旗一帶草地送入熱河境內昨已諭知常清迅速分解矣將此諭令知之○諭駱秉章奏南安竄匪攻陷桂陽等縣請飭撥馬隊助剿一摺江西南安等處大股賊匪欲由湖南趨鄂壘陷桂陽宜章興甯三縣見經駱秉章調集兵勇大舉進攻惟亟須馬隊以資追剿卽著於都興阿所部官軍內抽撥精壯馬隊二百名派得力員弁管帶前赴湖南聽候調遣並由官文胡林翼催趙前進毋稍遲誤至此股賊匪人數眾多蓄謀兇狡除肅啟江一軍已照駱秉章所請諭令耆齡曾國藩迅飭回楚外其由該撫調派之道員劉長佑等軍務當飭令迅速進剿以期收復各城盡殲醜類其失守地方之文武員弁並著查明參奏以儆其餘將此由六百里各諭令知之○諭本日據駱秉章奏江西大股賊匪竄湖南攻陷桂陽要隘後桂陽宜章興甯

三縣城池相繼失守見在此股逆匪既全數撲擾湖南且恐勾結粵東接境之匪竄入衡永郴桂一帶蕭啟江一軍四千餘人本係派援江西勦辦南安賊匪昨已據報克復府城今賊既由江竄楚亟應馳回勦辦著曾國藩耆齡卽飭蕭啟江統帶所部兵勇由間道馳回湖南聽候駱秉章調遣以資堵截而免蔓延將此由六百里各諭令知之○是月蠲緩安徽宿州等二十州縣並屯坐各衛被災額賦

三月辛未朔勝保翁同龢奏已革安徽布政使李孟羣帶勇駐紮官亭長城一路堵勦廬州西面賊匪二月初四日潛霍之賊由南路竄陷六安該員一軍有腹背受敵之勢自是逆眾屢以大股撲營該員奮激誓師當餉竭之餘猶能使將士踴躍用命以四千之眾擊退賊匪二萬餘斬馘不少詎十五日逆眾大至由官亭而達

長城徧地皆賊廬城復出大股來犯重重圍裏由辰至午先破副將鄧清知縣李孟羣兩營旋即併攻左右營副將盧又熊知府袁懷忠出戰相持至戌刻援盡力絕兩營繼失中營力不能支是夜丑刻賊來愈眾李孟羣持矛屹立圍牆厲聲罵賊手刃悍賊三名力竭陣亡全營俱潰見盧又熊袁懷忠收集潰軍一紮三覺寺以扼壽州前路一紮隱賢集以堵六安後路先顧北面免致上竄正陽然後再圖南勦據該副將等稟報前來臣等伏思李孟羣自從戎以來轉戰廣西湖南湖北安徽數省功績卓著上年因廬州失守奉旨革職責令自效半年來設防籌勦竭慮殫心臣等方以廬西一軍倚作干城之寄今以兵單餉竭營潰捐軀合無仰懇逾格恩施准予開復原官飭部照布政使陣亡例議卹以慰忠魂營內各員同時死難者查明再行請卹至副將盧又熊知府袁懷忠皆

李孟羣部下帶隊之員此次全營潰失咎無可辭應請旨革職仍
畱軍營戴罪立功以觀後效 上諭內閣已革安徽布政使李孟
羣以知縣帶勇從征自廣西湖南湖北安徽轉戰數省累著戰功
前因廬州失陷降旨革職仍令畱營剿賊茲以兵單賊眾力竭捐
軀殊堪憫惻著開復原官交部照布政使陣亡例議卹以慰忠魂
副將盧又熊知府袁懷忠不能救護主將雖因兵疲援絕究屬咎
無可辭均著革職仍畱軍營戴罪自效其餘陣亡各員著勝保翁
同書查明具奏○諭軍機大臣等本日據恆福奏逆氛逼近商固
請飭楚省就近撥兵會剿一摺皖省潛太大股逆匪連陷霍山六
安等州縣並分股四路竄突聲言由舒霍六安直達商固再擾麻
城豫省兵力無多距皖省各軍道路較遠惟楚師近在黃麻潛太
可以就近救援著官文胡林翼酌量抽撥精兵二三千名揀派得

力鎮將大員統帶前往會同豫軍合力剿擊救援豫境卽以保衛楚疆然不可專事防堵務須出境會剿視賊所向遏其兇鋒使不得擾及商固則楚豫兩省皆可安堵恆福已知照邱聯恩調南陽鎮標等兵馳往商固著卽飛催前進相機堵剿升任知府鄭元善知州張曜等見在光固一帶辦理堅壁清野並著飭令該員等先就見有兵力號召鄉團務於沿邊各要隘相機布置嚴密堵扼將此由六百里各諭令知之○命怡親王載垣往天津察看海防事宜○壬申諭軍機大臣等官文胡林翼奏遵將三河桐城偵事各員審明定擬一摺並稱軍營前敵需人懇請法外施仁等語已革總兵李續燾等隨同李續賓進剿皖賊因眾寡不敵先後潰敗雖無畏葸逃避情事惟不能力遏兇鋒以致喪師失律實屬咎無可辭已革總兵李續燾趙克彰已革副將謝永祐已革遊擊李運絡

均著從重發往新疆充當苦差已革副將朱希廣參將張嵩齡都司張養吾與賊接仗受傷力竭潰散已革副將楊得武戰已獲勝因遇霧敗退均與遇賊卽潰者有間業已革職著無庸議惟據官文等奏稱該革員等從戎七載身經大小數百戰見值行間需人請准飭赴前敵責令立功自贖著照所請所有李續燾等四員均著暫緩起解與朱希廣等四員一併畱於軍營交官文胡林翼差遣以觀後效儻再不知愧奮卽按軍法懲辦○以伊精額爲內閣學士由通政司副使遷○以捐輸軍餉永廣江蘇如皋金山學額各五名○甲戌諭內閣蔣霽遠奏剿辦正安等處逆匪獲勝一摺貴州正安州等處賊匪踞洞爲巢時出焚掠而思南之賊復由婺川竄入州境節經蔣霽遠飭令各該地方官練分投剿辦由巖門洞一帶進剿獲勝疊將駐馬山等處賊巢營卡以次攻破擒戮甚眾並將

葵川縣屬之上壩及西山賊硎沙窩等處賊巢踏毀又自蒲家山直達葵川縣城連破賊營十餘座攻破刺猪硎賊巢殺賊尤多其馬觜地方賊壘死力拒守亦經各隊練勇分路進攻賊眾大敗追擊至紅溪河硎腦復斃賊多名餘匪由螺蛳遁逃仍著該撫督飭各軍務將竄逃餘匪悉數殲除以靖地方○諭軍機大臣等景瀄等奏夷官不遵開導馳赴烏蘇里等處並據奕山等奏副都統吉拉明阿依理拒阻不從一摺俄夷石沙木勒幅等聲稱係木哩斐岳幅遣赴興開湖勘辦烏蘇里綏芬等處地界經吉拉明阿據理拒阻乃該夷等徑履冰下往將軍景瀄等見飭三姓署副都統富尼揚阿揀員馳往曉諭第該夷狡執異常必須極力阻止見已由理藩院行文該國薩納特衙門理論矣上年奕山允許該夷居住黑龍江左岸辦理已屬太易復輕許赴綏芬烏蘇里會勘地界致

夷酋藉詞狡賴若不嚴行拒絕吉林一帶地方又爲該夷占踞無
厭之求尙復何所底止至所稱丕業羅幅斯奇在京亦爲勘界不
知該酋此來係爲互換和約並未言及綏芬等處地界該夷之言
斷不可信奕山等當告以中國准俄國於海口通商並將黑龍江
左岸空闊地方許俄國居住無非欲兩國永敦和好至綏芬烏蘇
里等處原不與俄國連界若肆意侵占必致有傷友誼剴切曉諭
使該夷不至任意要求至奕山所擬通商條規內除該夷尙未議
定三條皆有關繫自應催令速行定議至第一條通商後兩國賣
貨俱不徵稅雖係照伊犁塔爾巴哈台舊章辦理但見在海口各
國俱係納稅若不徵稅恐與海口章程有礙且恐各國有所藉口
著奕山等將此條另行妥議具奏總須俟奏定後方能與該夷言
明照辦奕山另摺奏請將撤任副都統暫行回任等語吉拉明阿

辦事頗預實屬咎無可辭惟據該將軍奏稱見當夷務喫緊未便遽易生手吉拉明阿著革職暫畱本任仍責令該員力圖挽救以贖前愆奕山於擬定條規並不先行具奏著傳旨嚴行申飭木哩斐岳幅如行抵黑龍江該將軍務懷遵諭旨妥籌辦理毋得再事遷延自干重罪將此由五百里各諭令知之○諭蔣爵遠奏請將畱黔補用之副將田興恕補授都勻協副將一摺已明降諭旨准其補授矣惟前據駱秉章奏江西南安大股賊匪突竄湖南攻陷桂陽宜章興甯三縣情形甚爲喫緊已咨調畱黔副將田興恕兼程回湘等語見在蔣爵遠已派田興恕署理古州鎮總兵如另有得力之員堪以委署鎮篆卽飭田興恕帶兵暫回湖南以資攻剿儻實因該員在黔得力必須畱以剿賊而古州鎮亦一時委署乏人蔣蔣爵遠卽與駱秉章咨商辦理毋得顧此失彼將此由六百

里諭令知之○子貴州陣亡同知石虎臣等祭葬世職○乙亥諭
軍機大臣等張芾奏賊竄建德已飛檄江長貴等派隊往援等語
據稱祁門擊敗之賊竄入建德之黃柏鋪等處經守備張泰忠等
接仗頗有斬獲旋因大股麇至張泰忠等退守葛公鎮致賊眾直
撲城廂內外冀圖外竄雖經張芾飛檄江長貴等派兵援剿第恐
兵力尙單著和春就近知照鄭魁士帶兵往援如該逆占踞建德
著卽會同江長貴迅圖克復縣城儻賊匪假道建德卽竄池州則
鄭魁士欲往勦池太卽可會同該地方官合力堵剿毋令賊勢蔓
延將此由六百里各諭令知之○丙子命副都統伊興額督辦河
南防剿事宜○復河南陣亡已革總兵官邱聯恩原官予祭葬世
職如提督例參將福瑞祭葬世職如副將例○丁丑諭內閣勝保
翁同書奏官軍扼剿圍撲護城賊匪連獲勝仗一摺安徽逆匪糾

集安慶賊黨圍撲護城營盤經勝保親督大隊馳往勦辦副將格洪額等帶領馬步分路接應該逆撲至護城以北之王家橋列隊西南北三面山岡我兵前隊過橋轟擊復用火箭噴筒拋入壘中木城火起兵勇一擁而入斃賊甚眾餘匪棄壘狂奔立將西北賊營兩座平毀該逆復由南岡分股接應我軍後隊分路迎戰護城營內官軍亦卽出隊內外夾擊將東西圍營之賊衝散護城重圍立解西南面賊眾乘我兵撤隊之際復敢全股來犯賊首陳玉城等往來衝突勝保飛令馬隊分兩翼包鈔並令親軍小隊兵勇以短兵回擊鏖戰良久將賊眾壓回西南岡是日計連踏賊營四座殲斃長髮賊二千餘名陣斬賊目則天幅等五名著勝保等督飭將士乘勝進攻埽除賊氛毋稍延緩○諭軍機大臣等連日據恆福奏亳州捻匪闖入豫境竄陷甯陵睢州經官軍立卽克復該匪

復撲擾西華縣勢甚猖獗河南山東一帶僅有疏虞處處可以北
竄深爲可慮著僧格林沁於防海官兵內酌量抽撥馬步精兵一
二千名前赴黃河岸擇要防堵揀派得力大員統帶前往儻聞何
處告警卽可就近馳援以期有備無患如抽撥以後海防不敷調
遣尙有各路豫備官兵可以奏調補數如足敷調遣則暫緩添調
以節經費著該大臣酌量辦理至直屬大順廣等處民風素稱獷
悍見值鄰氛甚熾深恐勾結滋事前調本省官兵一千名在大名
駐紮應否再行添調以資布置著文煜酌度情形妥爲調度將此
各諭令知之○諭昨因捻匪竄擾豫境伊興額統軍赴援已明降
諭旨命該副都統督辦河南防剿事宜矣惟該副都統係幫同傳
振邦勦辦捻匪之員一切緩急機宜自應與傳振邦和衷商辦通
籌兼顧河南爲完善省分固應極力保全而清淮逼近徐宿由靈

壁泗洲五河一帶皆可繞越北竄擒匪於馬隊官兵素所畏憚卽應分投布置方不至有偏輕偏重之患傳振邦已撥馬步隊一千一百餘名援豫而伊興額復將全營馬隊悉數帶往則東路未免空虛勝保節制安徽全省軍務著卽統籌酌度將傳振邦伊興額所帶馬隊酌量成數均勻分撥俾兩路不至偏枯傳振邦伊興額務當和衷商榷審度輕重不得各執己見專顧一面致誤事機將此由六百里各諭令知之○予安徽陣亡總兵官柏山祭葬世職○己卯諭軍機大臣等本日據桂良等奏探聞夷情仍堅欲進京並鈔錄夷文各件業經諭知桂良等再加開導設法挽回矣惟披覽照會各件情詞桀驁並據桂良等奏探聞有英夷帶兵二千名船十餘隻直赴天津佛米兩夷各帶兵船之信見在桂良等如能設法羈縻令其卽在上海換約固屬妥善如竟不能阻止則到津

後亦非口舌所能爭勝況旣帶兵船必至用武前諭僧格林沁於
防海官兵內酌撥馬步精兵一二千名赴黃河北岸扼紮日內尙
未據覆奏急宜厚集兵力以資捍衛此項官兵調出後深恐海防
不敷調遣卽著該大臣酌量各路豫備官兵內應行調補若干迅
速具奏以便早爲催調將此諭令知之○庚辰諭內閣恆福瑛棨
奏官軍擊退北路捻匪回巢並勘辦南路大股匪徒獲勝一摺毫
州捻匪圖竄河南邊境闖入鹿邑縣屬旋經兵勇剿退該匪復撲
柘城縣經代理知縣陳桂林督勇守禦合力堵剿賊眾向東南敗
走竄回皖境其前次竄至杞縣之賊向考城邊界奔竄伊里綳阿
等督率兵勇兜擊賊卽敗竄其前隊馬賊撲至歸德府城南關知
府孫鳴珂等督軍守禦各鄉團勇復出策應匪眾均向皖境竄回
老巢其南路竄擾舞陽等處之匪經伊興額馳往剿辦在商水縣

東南遇賊接仗馬隊四面鈔擊自辰至申鏖戰五時之久賊始紛紛潰散官軍乘勢追殺直至安徽太和縣境馳逐三晝夜沿途擊斃淹死者不計其數此股捻匪業已殲除殆盡仍著瑛棨等督飭將士認真搜捕勿畱餘孽○諭恩慶奏查辦裏塘夷匪讎劫各案審斷完結一摺此案格桑喇嘛彭錯扎巴洛珠二名因查祿頭人恥本格喜謀爭副堪布缺挾讎互劫輒敢屢次撤站藉端挾制實屬刁狡著照所請發往前藏交地方官嚴加管束查祿頭人乍魯祥秋等以爭缺微嫌竟至糾眾滋事讎劫數年亦屬法無可貸姑念其悔罪輸誠已將兇夷縛獻著從寬免其究處夷目鄧珠拒傷土官登時殞命著卽行正法以儆兇頑○諭軍機大臣等前因豫省肅清據曾望顏奏請將商雒防兵悉行裁撤近據恆福疊次奏報亳州捻匪闖入豫疆竄擾甯陵睢州蔓及西華等處經官軍截

剿獲勝匪勢已挫難保不復行滋蔓陝省商雒等地方撤防後據
曾望顏奏稱仍將保甲團練加意整頓各處村莊有未設立塞堡
者飭令修築見在鄰氛不靖辦團築堡等事必須實力經理著曾
望顏卽行飭屬認真籌辦如河南捻匪有西竄消息應行調兵堵
剿卽飭曾望顏會同經文岱豫籌布置以期有備無患將此由五
百里諭令知之○豫撥吉林黑龍江馬隊官兵各二百名備奉天
防所調用○予河南陣亡州判史存禮等祭葬世職○辛巳諭內
閣昨據恆福等奏官軍剿辦南路大股匪徒獲勝茲據伊興額奏
稱督帶馬步各隊追賊至商水縣屬之老湖坡地方該逆回頭抗
拒官兵分路齊進伊興額繞出賊後佐領穆克德布富亮等奮勇
爭先匪勢不支紛紛敗退官軍乘勝追殺直至太和縣之孫家圩
大獲全勝著卽乘勢進攻宿州西南各賊圩務期淨絕根株毋畱

餘孽○以捐輸軍餉永廣浙江海甯歸安鎮海學額各三名烏程二名山陰蕭山諸暨上虞鄞各一名○壬午諭軍機大臣等僧格林沁文煜奏遵旨酌撥官兵一摺僧格林沁於海防抽撥昭烏達吉林黑龍江官兵共二千名派員統帶前往黃河北岸文煜並撥官兵一千名交大名鎮道擇要防守均著照所議辦理惟抽撥之後海防兵力較單本日已諭景瀄特普欽奕山將吉林黑龍江備調之兵各一千名飭令迅速啟程仍於山海關截畱各五百名其餘一千名卽屯紮天津海口並照該大臣密咨俟此次官兵到防後再令常山樂善等統帶所撥之兵前往黃河北岸以資防堵所需馬匹已諭慶昫挑選迅速解津並傳知武備院製備弓箭等項聽候該大臣調取疾另片奏大沽海口布置周密不可令人窺伺等語夷船如至海口該大臣等仍遵二月二十九日所寄諭旨先

行派員曉諭如有旨准其進京換約卽令其在攔江沙外停泊用內地船隻渡進內河由北塘登陸到津仍由水路至通屆時酌量辦理可也將此諭令知之○調吉林黑龍江挑備官兵各一千名分赴山海關天津防堵○調察哈爾牧羣馬二千匹解往天津備用○癸未諭內閣駱秉章奏查明已革總兵各劣蹟實據並有侵虧營餉重情請拏問提訊一摺已革湖南永州鎮總兵樊燮有署內差役冒領兵糧攤派養廉蓋造房屋並演戲賞耗開銷公項各劣蹟前經諭令駱秉章查明參奏茲據奏稱該革員種種劣蹟均有確據且擅提廉俸數至盈千懸款無著署中一切使用復提用營中銀錢至數千之多實屬恣意侵虧大干功令亟應徹底研究以儆官邪樊燮著卽行拏問交駱秉章提同人證嚴審究辦並著湖南巡撫飭查該革員見在行抵何處卽日委員押解湖南聽候

查辦○諭軍機大臣等傳振邦伊興額奏進擣滄南賊巢並疊次擊退外援一摺此次官軍剿擊擒匪擒斬甚多惟畢家集賊圩尙未攻破亟應乘勝進剿迅克賊巢傳振邦見帶馬步兵勇前赴滄南著卽會同苗沛霖等兵練節節掃蕩伊興額回抵濰口亦著隨時商酌探明何路緊要卽向何路奮擊毋令該匪再行紛竄將此由六百里各諭令知之○諭前因擒勢猖獗疊次諭令東豫兩省官兵出省會剿本日據傳振邦等奏進擣滄南賊巢連次擊退外援擒匪屢受懲創亟應乘勝進攻以冀掃穴擒渠盡殄醜類著崇恩卽飭黃良楷富新等速行會合傳振邦移師進剿毋稍遲延河南官兵已歸伊興額統帶所有豫省進剿機宜卽由該副都統妥爲調度瑛棨仍飭本省帶兵各員會同前進不得株守一隅致滋貽誤將此由六百里各諭令知之○諭前因宿州軍營需餉甚急

當諭山東河南山西各將欠餉並每月應解餉銀趕緊籌解嗣據
河南山西各奏報解銀數萬兩及萬餘兩不等而山東並未報解
見在捻氛尙熾傳振邦等一軍西援永毫東控靈泗以扼北竄勦
辦正當喫緊而每月發餉不足十日之數甚至兵飢逃散營員自
縊情形甚爲危急著崇恩英桂瑛榮各嚴飭藩司將每月應解協
餉二萬兩依期如數解濟其從前積欠若責令一時全解恐力有
未逮著自本年三月爲始按月搭解一萬兩毋再推延並著曾望
顏每月協濟銀二萬兩解赴徐州糧臺應用將此由五百里各諭
令知之○于安徽陣亡知府顏懷忠等祭葬世職○甲申 上詣
靜明園 龍神祠祈雨○丁亥諭內閣勝保等奏官軍擊退護城
大股逆匪疊獲勝仗一摺護城東面賊壘前經勝保督兵踏毀並
移營八斗嶺等處進偪賊營本月初四五等日該逆率眾分三路

出撲八斗嶺勝保揮軍迎擊馬隊由兩翼包鈔伏兵齊起賊眾慌亂回奔我兵奮勇追擊十餘里其西路賊匪撲近辛家岡卽經守備徐立壯等帶領馬步迎頭截剿斬擒甚多初六日穆騰阿等督帶馬隊由東面趨赴梁園一路行抵護城以東之葛家集適遇該逆大股排隊而來我兵撤上山梁誘賊撲近驟馬回擊殲斃賊匪無算賊向界牌一帶逃遁餘匪搜殺殆盡並將賊營二十餘座焚毀護城肅清仍著勝保等督飭將士扼要堵剿將竄匪悉數殲除毋令逃逸○己丑諭軍機大臣等前諭勝保將傅振邦伊興額所帶馬隊均勻分撥俾兩路不至偏枯茲據伊興額奏稱見帶馬步兵勇不及傅振邦之多再難撥留等語伊興阿督辦河南防剿事宜究與傅振邦共辦一事見在移營永城縣界距賊圩甚近既可扼賊北竄且可援應鹿邑陳州一帶見在擒匪有竄擾陳州之說

該副都統自應探明賊蹤就近策應傅振邦原帶兵勇爲數本多
又有山東會剿兵勇四千名足敷分布所有伊興額兵勇自可無
須撥留一俟西路肅清仍應與傅振邦合剿圩賊不得以有用之
兵株守豫境致有貽誤傅振邦係幫辦勝保軍務伊興額又係傅
振邦幫辦之員或應分攻或應合剿均應統籌全局同心剿賊不
得稍分畛域致負委任將此由六百里各諭令知之○庚寅諭內
閣朕御極以來屢經特詔求言內外臣工敷陳時事凡有關國計
民生者無不隨時採擇立見施行本日據許彭壽潘祖蔭楊泗孫
奏入春雨澤稀少請戒諭諸臣臚陳得失等語夫遇災修省原非
博納諫之虛名況見在軍務未平民困未蘇朕祇承 祖訓上返
天庥宵旰焦勞無時少釋在廷諸臣自各部院堂官至科道等
原准其隨時獻納並未豫飭其緘默旁觀各大員等羣力匡襄尙

有能喻朕意者至科道等身列諫垣遇事直言方爲不負職守近來頗有不盡爲公者卽如去歲科場案出率皆諉爲不知不獨巧避怨謫兼可瞻徇年誼世道人心若斯澆薄誠堪浩歎朕深愧訓諭無方繼自今若不激發天良敷陳要政以補救時艱國家安用此臺諫爲耶將此詳諭在廷諸臣知之○諭戶部奏請飭籌辦淮南鹽務酌擬條款開單呈覽一摺淮南鹽課爲撥解大宗近年因長江梗阻經戶部議令就場收課辦理數年稍有起色尙未能復舊額亟應設法籌辦以裕課款著照該部所議如通泰各場於適中之地駐紮武職大員稽察出入以杜偷漏泰州總局及分局酌增稅銀淮鹽侵越浙岸於京口等處地方設卡抽收稅銀抵補浙課又事務較簡各場鹽官酌量裁併又川淮各私由湖北闌入湖南必由岳州經過於該府設局抽稅其餘毗連川粵處所各設稅

卡以防偷越江西饒州吉安建昌九江等府各於適中地方設局仿照湖北章程一律收稅所議均尙周妥各該督撫果能認真籌辦於鹺務餉需實有裨益著兩江總督江西湖南各巡撫悉心籌畫妥速辦理另片奏准北代納協貼懸課綱運積壓未據奏報等語並著何桂清庚辰長迅飭運司運判等實力督催卽將乙卯綱課額全完奏報覈銷並將臨淮等處各卡抽收鹽釐抵完協貼懸課數目一併造報丙辰綱各販停積之鹽亦著飭令設法營運完課毋誤要需○辛卯李鈞以病免以黃贊湯爲河東河道總督張錫庚爲刑部右侍郎

由左副都御史遷

○壬辰諭內閣勝保翁同書奏逆匪

出撲官兵截剿大獲勝仗一摺勝保自擊敗護城大股粵逆後移營殷家澗懷遠捻首龔得糾眾撲至胡家集勝保派副都統穆騰阿等統帶馬隊分路前進該逆擁眾來撲遊擊黃得魁首先帶隊

衝殺匪勢不支我軍乘勢施放火箭馬隊兩翼包鈔勝保復揮兵接應該逆敗退我軍由西北追殺殲賊一二千名生擒數十名奪獲旗幟槍礮數百餘件粵匪勾結逆捻圖犯定遠經勝保督軍痛剿大挫兇鋒著卽乘勝進攻迅殄醜類毋令蔓延○前任河東河道總督李鈞卒予祭葬如軍營病故例子額外郎中文源服闋後以郎中候補○甲午諭軍機大臣等前因伊興額管帶全部馬隊赴豫東路空虛諭令勝保將馬隊均勻分撥嗣據伊興額奏見帶馬步兵勇不及傳振邦之多豫境剿匪喫緊復諭勝保毋庸將伊興額兵勇撥畱茲據傳振邦奏濰口馬步各營未便移紮豫境請將山東兵勇四千名暫歸伊興額統帶並籌度西路形勢酌分馬隊以均兵力等語濰口各營兵勇扼紮徐宿要隘與宿州軍營聲勢聯絡且可兼顧靈壁五河等處伊興額若將濰口馬隊悉數帶

往永城則宿州後路空虛儻有疏虞所關非輕該副都統欲移紮永城而令崇安暫駐鹿邑但永城爲河南最東偏隅未能遏賊西趨之路惟亳州爲歸陳門戶東北可顧永城西南可顧潁川爲河南全省屏蔽伊興額旣統豫軍自應扼要駐紮亳境令崇安分駐太和縣之淝河口並令山東兵勇紮永城以南統歸調遣至河南原有兵勇六千見歸伊興額統帶兵力已厚著再撥吉林四起及仁義前敵四營馬隊兵勇六百名一併進紮亳州其黑龍江馬隊及濰口步隊仍畱傳振邦調遣以均兵力伊興額本係傳振邦幫辦務當和衷共事商酌機宜未可固執己見見在孫葵心劉狗等勢尙猖獗著該副都統迅速進剿至傳振邦痛剿畢家集賊匪該匪窮蹙乞降而賊情反覆恐不足恃仍當加以兵力毋致爲其所誤將此由六百里各諭令知之○諭本日據勞崇光奏英佛各國

兵船駛至梧州旋即退回廣東一摺據稱有英佛各國火輪等船載兵一千餘名由廣東省城駛至肇慶並分出船隻於正月二十二日駛至梧州城外其隨同前往之廣東番禺縣縣丞卓秉森稱係由廣東巡撫柏貴派委請見提督崑壽該國官員帶同兵丁二十餘人登陸遊行並在城外步量街段登山繪畫地圖旋於二十一日開船而去等語見在各國和約尚未互換其通商海口原准前往貿易但從無攜帶兵船深入內地之事況粵西並不在通商之列該國人員遽帶火輪兵船突如其來該省民人不免驚疑設或滋生事端豈得謂中國有乖和好此事黃宗漢柏貴何以均未奏及柏貴近在省城以後英佛等國如再有此等舉動該撫務當竭力阻止免致議和之後復有意外之變至此次英國人一名斯託賓齊一名墨克福第佛國人名達博威俱言語不通又一名巴

夏禮能通華語均與崑壽相見並稱秋冬再要出遊著柏貴妥爲
開導使不至再蹈前轍將此由五百里各諭令知之○撥四川司
庫銀三萬兩濟廣西餉需○乙未諭內閣四月初九日 常零大
祀朕因未能勉行全禮特遣豫親王義道恭代朕仍入宮齋戒先
期親詣 皇穹宇行禮藉摠誠敬昨據御史陳濬援引經義請親
行初獻禮後再行遣王恭代終事與朕寅畏之心亦相符合惟古
今禮制不同揆諸見行祀典實難於初獻之後續行恭代俟朕躬
日臻康健步履如常即可親行全禮此次毋庸更改○丙申諭軍
機大臣等奕山奏遵查黑龍江通商事宜仍請免徵稅課一摺據
稱前議條規原係專指黑龍江一處因地屬邊疆與伊犁塔爾巴
哈台事同一律非海口輻輳之區可比請仍准互相換貨免徵稅
課等語此款既經該將軍與木哩斐岳幅反復辯論應允在先勢

雖更改止可俯從所請互相換貨免其徵稅其餘三條著催令迅速定議仍遵前旨先行奏明俟奉到諭旨方准向該夷允許至綏芬烏蘇里兩處事關疆土尤爲緊要俟木哩斐岳幅到時該將軍務當正言拒絕不可仍前輕率自干重咎見在俄國使臣丕業羅幅斯奇在京互換和約已與言明界址一事仍歸黑龍江吉林將軍覈辦與天津所定各口通商和約無涉奕山不得向京中推諉將此由五百里諭令知之○惠親王等奏洋藥一項業經立定科則惟各省見辦釐捐此項洋藥既准其販運內地且各省本地出產亦復不少該地方官自必一律抽收釐捐若不酌定徵解章程難免隱匿擬請軍務省分所收洋藥釐捐准其畱支軍餉仍按三箇月造冊報部查覈其無軍務省分照前奏關稅章程按三箇月一面報部一面起解不准畱抵別項支用致滋牽混從之○丁酉

諭軍機大臣等勝保奏通籌剿賊大局宜合力並舉並繪圖呈覽一摺所稱以皖軍會搆六合楚師由西面力攻舒桐安慶合力痛剿則浦口後路自易肅清可以合圍金陵設該逆仍集東南不復西救則楚軍乘勢進逼亦可長驅直下此時應以皖軍會剿東南楚軍力攻皖北爲上策等語前據胡林翼奏稱皖楚之要以黃州爲適中保楚乃能謀皖地勢賊情非分三路併力進剿必難成功官文亦謂胡林翼不宜入皖前敵不宜添兵該大臣等督兵剿賊係共辦一事惟在相度地勢體察賊情乘機進取以收師克在和之效胡林翼駐紮黃州數月以來諒已布置周妥楚師有多陸阿爲前敵節節進剿而孤軍未可深入曾否派兵爲其後路見在皖北賊匪麇集亟待楚師水陸分攻舒桐廬州安慶以分賊勢勝保翁同書亦應督飭各軍合力會剿不得專恃鄰省官文前因湖南

桂陽等縣被匪竄陷調水師馬隊馳往援剿此項援軍俟湖南軍務稍平亦可撤回併力赴皖使皖北之賊有所顧忌不至肆意蔓延庶於大局有裨勝保兵力尙不爲少務須南北兼籌互相策應上年李續賓一軍爲百戰勁旅竟以深入無援坐失名將殊堪惋惜今議合剿之舉勝保當先與官文胡林翼商酌機宜固不可盡疆自守亦不可輕進貪功務須計出萬全以冀膚功早奏將此由六百里各諭令知之○諭前據勝保等奏請在徽甯兩府勸捐後因張芾駐兵徽州復請改由江浙兩省寄籍皖省紳商集捐而以皖南捐輸歸張芾辦理茲據勝保等奏稱張芾復委紳董欲至蘇州上海各路勸捐等語兩處辦理捐輸均係接濟軍餉未便稍涉偏枯著何桂清卽傳旨知照張芾該京卿旣駐兵徽境所有皖南各府勸捐悉歸辦理其江浙等處勸捐悉歸勝保翁同書派員辦

理以濟皖北軍需不得紛紛越俎致令紳商觀望將此由六百里
諭令知之○戊戌諭內閣御史鄂堃奏請慎刑獄以召和甘等語
本年入春以來雨澤稀少疊經降旨虔申祈禱並親詣黑龍潭拈
香昨復降旨再申虔禱以冀渥沛甘霖因思清理庶獄亦感召和
甘之一事著刑部及步軍統領問刑各衙門將見審未結各案細
心推鞠當罪者卽行擬結無辜者勿令久羈其輕罪人犯及干連
待質例應取保候審者立予清釐省釋毋稍稽滯以示矜恤而遂
祥和○諭傳振邦奏攻破畢集賊圩擒斬著名擒首一摺擒首任
乾率其死黨盤踞畢圩號召擒匪經傳振邦密派練丁傳諭該圩
被脅難民乘機內應殺賊贖罪本月二十一日夜傳振邦督率關
保常陞等四面兜擊該逆率黨外撲不能得脫仍返身回遁我軍
乘勢追進二道賊濠知府苗沛霖首先衝殺圩內難民內應先將

任乾殲斬並會合官兵將死黨千餘名擒斬淨盡無一漏網此次平毀賊圩剪除捻首辦理甚爲得手傳振邦見已移營前進著卽乘此聲威亟圖掃蕩無畱餘孽○諭軍機大臣等桂良等奏見在布置並探聞夷情一招進京換約一節既有華商設法勸阻該夷到滬後或可在上海定議惟此時駐京等四事尙未挽回若先將條約用寶發交該大臣等設夷情狡執徑赴天津桂良等更無把握彼時再將條約齎回亦徒耽延時日○謂夷情躁急迫不及待要豫先說明往返兩旬亦不至令其久候該夷四月初十前後可以到滬桂良等屆時卽赴上海將四事設法挽回不可但至附近地方專恃委員辦理如四事說明另立專條該夷肯在上海換約卽迅速馳奏儻該夷必欲來津桂良等仍遵前旨於王有齡辭煥吳煦三員中酌帶兩員馳驛來京辦理至該夷前已言明另擇

別地居住但未指明何處該大臣等亦須先爲商酌卽直隸地方亦不可任其居住於大局方無窒礙總之普酋既有到滬之信桂良等惟當竭力阻止逐件挽回不可畏難自阻將此由六百里諭令桂良花沙納何桂清並傳諭段承實知之○庚子諭內閣蔣蔚遠奏貴定等處剿賊疊次獲勝一摺貴州荔波縣巴亢坡賊匪攻撲水東大寨經署知縣吳德容等將賊營攻破該匪糾同粵匪往攻吳德容營盤又經官軍擊退遊擊劉學武與吳德容分隊兜剿復殲斃賊目十餘名夥賊二百數十名並生擒僞軍師等其文生滕永蘭等在茅蘭督團截擊亦斃賊百餘名生擒四名署獨山州侯雲沂守備龍建極督兵分路進剿爛土賊營又圍攻拜浩賊營疊斃賊目多名連破賊營五座其甲照之賊亦被我軍擊潰嗣龍建極等進剿至甲照山腳攻破賊壘時都勻麻哈之賊欲圖上竄

遊擊王萬祥等於牛了山等處分路剿擊共斃賊六七百名嗣官軍進攻浪壩等處又斃賊八九百名總兵巴揚阿旋將匪眾設法招降其教匪頭目陳銘勳率黨赴營投誠剿賊自贖餘匪十餘寨俱聞風歸順統計有萬餘人之多巴揚阿卽令陳銘勳會同官兵復攻腰家坡等處破賊營七座又於下河牛了山柳黨石灰坡等處殲斃賊目九名夥賊一千餘名此次獨山荔波剿賊屢獲勝仗辦理尙爲得手著該撫卽飭帶兵將弁乘勝進剿迅圖克復○命王庭蘭畱安徽剿匪以賈洪詔爲貴州按察使由雲南進南道遷○賞故戶部右侍郎何彤雲子逢孫舉人